

Z d
890





Qk 307.

^{v. Nostitz}
Leich Predig.

Z d.
890

Über der Christlichen

Leich vnd Körper / des Bestrengen / Edlen
vnd Ehrenhessen Herrn Casparn von Nostitz des Eltern
auff Jamen /c. Welcher daselbst im Marggraffthumb Ober
Lausitz / Im Herren Christo / Sanfft vnd seliglich entschlaffen ist /
Am Sonnabende / des Tages S. Antonij / den 17. Januarij / zu
nachts vmb 11. vhr / Vnd inn beysein einer Christlichen / Erbaren
grossen Frequenz vnd versamlung / löblicher Adels vnd anderer Per-
sonen / am Freytag vor Sanct Pauli bekerung den 23. Janu-
arij / In seiner Pfarrkirchen zum Klitten / Begraben /
Im 1587. Jahr / nach Christi Geburt.



Durch

Den Alten Laurentium Dresserum Girca-
uientem, Euangelischen Prediger
zu Budissin.

Viuit post funera uirtus.

Gedruckt zu Budissin / durch
Michael Wolrab.



Faint, illegible text, possibly bleed-through from the reverse side of the page. The text is arranged in several lines and is significantly faded and obscured by paper texture and stains.



Der Bestrengen / Ehr

vnd Zugentreichen Frawen Annen / gebor-
nen von Bersdorff / vnd den auch Edlen vnd Ehren-
vhesten Junckherrn / Casparn / Erasman / Georgen / Nickeln /
Christoffen / vnd Franken Gebrüder von Nostis / Des Bestren-
gen Edlen vnd Ehrenvhesten Herrn Casparn von Nostis / Selig-
gen / Auf Jamen /c. Nachgelassner Wittfrawen / Ihrer bei-
der Kindern vnd Erben / Seiner großgünstigen Frawen /
Günstigen Junckhern / Förderern vnd guten Freunden /
Sampft vnd sonderlich.

Sestrengte Ehr vnd Zugentreiche Fraw / Auch
Edle vnd Ehrenvheste Junckhern Gebrüdere vnd Ge-
schwister von Nostis. Es lehret vnd vermanet der Hei-
lige hohe Apostel Paulus / 1. Thessa: 4. Seine Thessa-
lonicher in Macedonia / vnd neben ihnen / Uns vnd alle liebe Chri-
sten / heut vnd zu allen zeitten / Das sie sich / Ob dem Tödelichen ab-
gang / Ihrer geliebten / Es sein nun Ehleute / Eltern / Kinder / Ge-
schwister / Oder sonst verwandte / vnd geliebte Freunde vnternan-
der / Die ein ander herzlich lieb gehabt / Vnd eins das ander gar
vngerne vbergeben hat / Da denn herzlich betrübnis vnd grosse
trawrigkeit / Sonderlich weil der fall vnd leid noch new ist / Doraus
entstehet vnd erfolget / Vnd ist solches Natürlich / vnd *in praesenti-
bus Naturis*, so viel dieselben hoher / Herrlicher vnd besser seind / So
viel dester grösser vnd hefftiger / zwart ein zeitlang betrüben vnd
trawren mögen / Aber nicht wie die Heiden / Sondern mit Christi-
cher maß vnd bescheidenheit / Damit wir nicht darsür angesehen vnd
gehalten möchten werden / Als hetten wir gleich den Heiden / darsür
vns Gott behütet / wenig oder keine hoffnung der Auferstehung des
Fleisches vnd eines andern / weit bessern / Ja des rechten freudenrei-
chen Ewigen Himlischen wesens vnd lebens / durch Christi verdienst

vnd Gottes Barmhertzigkeit / für vns vnd die vnsern seliglich ver-
schieden / zugewarten / Oder / als wolten wir mit Gott / einen ver-
geblichen / vnd / recht zu reden / Herrlichen Krieg anfangen / vnd sei-
nem ergangnen / allergnedigsten / besten / vnwiederbringlichen Dä-
terlichen willen ungehorsamlich widerstreben / Damit wir doch gar
nichts außrichten / sondern vns in seinen gerechten zorn vnd andere
Straffen / Ja wol in Leibs vnd der Seelen seligkeit gefahr / Je len-
ger Je tieffer / mit vnserm zu gar Vnchristlichen murren vnd vnges-
dult / wie mans zuweilen / vnd offte / auch nicht von so gar geringen
Chri- / höret vnd erföhret / einstecken vnd vortreuffen würden /
Dann es bleibe doch wol war vnd bey dem / wie die gemeinen wol-
bekandten alten Versen singen vnd sagen.

*Non reuocant surdos hominum suspiria Manes,
Nostra nec extinctis possunt lamenta mederi.*

Das geb ich gut ein feleg also.

Was Tod ist / Nicht mehr höret vns /
Da ist das leide vnd heulen vmbsonst.

Sancet Paulus Lehret aber die Christen dabey / Was sie als
dann / Ihres Landts dester ehr zuuerlassen / Ihr trawren Christlich
zu messigen / Vnd alles dem guedigen vnwiederbringlichen willen
Gottes / demüthig / mit sanffmut vnd gedult gehorsamlich zuerges-
ben vnd heimzustellen / bedencken vnd thun sollen / Nemlich / sich sel-
ber vnd andre / (vnd wie die wort lauten) vnternander / Ob ihren in
Gottes sanffte ruhenden vnd schlaffenden Christen / mit Gottes
Wort / aus dem verdinst Christi / was der vns / vnd allen gleubigen
lieben Christen / Mit seinem Vnschuldigen Bittern Leiden / Todt /
Sterben vnd tewren Blutuegüssen / Mit seinem Begrebnis
vnd Hellenfarth / vnd hierauff erfolgten frölichen Auferstehung
vnd Himelfart / warhafftig erworben / Vnd der liebe Himelische
Vater aus lauern gnaden (Drumb es auch alles / so viel dester ge-
wisser ist vnd sein wird) Vmb Christi seines lieben Sohnes willen
zugesagt vnd versprochen hat / von herzen tristen vnd im Geist wis-
der

Der erfreuen vnd erquickten. Vnd mehr das thun vnd bedencken/
was der liebe König vnd Prophet David thate/da im auch gar ein
herzliches Söhnlein/ Nicht in hohem alter / Sondern in seiner zar-
ten Kindeheit vnd blühenden Jugendt gestorben/vnd durch den bit-
tern Tode/ aus seinem schönen Wiegelein (welchs alles für den
Tode nicht hilffet) heraus gerissen vnd weggenommen hatte. Weil
das Kind da lag vnd suchte/ gehabte sich David/nach Art vnd weis
des Väterlichen vnd Mütterlichen herze/mit leid vnd erawrigkeit/
Wie wir vns in solchen sellen fast alle zugehaben pflegen/sehr vbel/
Als er aber vernam/das Gott das Kind von seiner krankheit/vnd
schmerzen durch den Tode entbunden / erzeiget er sich baldt frölich
vnd sagt 2. Reg: 12. Was hilffe mich doch gros erawren vnd leid-
tragen? Kan ich in auch wiederholens? Nein zware / Ich werde wol
zu im fahren/Er kömpt aber nicht wieder zu mir. Gleiche gedank-
en maß vnd weis/sollen wir auch halten/mit vnserm/leid vnd eraw-
rigkeit/ Das ist/vns mit zu gar ungeberdig vnd ungeduldig stellen/
sondern mit iüertlicher freud vñ trost erinnern/was wir Gotelob für
vns haben vnd wissen durch des Herren Christi thewres verdienst/
vnser selbst vnd aller der vnsern Christlichen verstorbnē halben/*Non
emittimus, sed prae-mittimus* sagt D. Ambrosius. Es heist nicht auß
ewig/sondern nur auß eine gar kurze zeit/wie es Christus selber Jo-
an: 16. ein *Modicū* vnd *puffellum*, ein kleines nennet/geschaidē. Viel
weniger vntergangen oder verstorben/Ob ein Christ gleich leiblich
oder zeitlich stirbt/Mit nichten er drum gar vortirbt / Singen die
lieben Christen/im Geist frölich vnd getrost/Aus der vberaus schö-
nen/Geist vñ trostreichen Leichpredigt Christi/ober dem verstorbnem
Lazaro/den er auferweckete / Ob er gleich vier tag schon im Grab
gelegen/vnd angefangen hatte zu stincken/das ist verfaulen vnd ver-
wesen/Leset die Histori oft / vnd macht sie euch ja wol gemein vnd
bekandt/Joan: am 11. cap. Wie S. Paulus von Gottes Wort vnd
der Heiligen schrift/sagt Colos: 3. Lasset das Wort Christi reich-
lich vnder Euch (Ja auch in Euch) wonen/in aller weisheit.

Diese vnd dergleichen Artikel / Historien vnd Trostsprüche /
meint one zweiffel der H. Paulus in Gottes Wort vnd Heiliger
Schrieffe / do er auff solche felle lehrt vnd sagt / So tröstet euch nu
vnternander mit diesen wortten / Wie dann Gottlob auff dieser art /
vil feiner Christlicher Trostbüchlin vorhanden seind / Durch Gott-
fürchtige gelerte Leute fleissig zusammen getragen. Vnd zeigt der
Apostel zugleich sein deutlich / mit ahn / Den vrsprung / Nus vnd
brauch / dieser alten gutten / nöttigen / Christlichen ordnung vnd ge-
wonheit / Neben Christlichen Gesengen / auch mit öffentlicher Pre-
digt in Christlichen versamlungen / Ob der bestattung vnd begre-
nis / die Leichen vnd Toden Körper / vnserer aller Mutter / der lieben
Erden vnd Gräbern / Auff hoffnung einer herrlichen / frölichen Auf-
erstehung mit verflertem Leib / zum freudenreichen Ewigen leben /
zubefehlen / Ja wie der alte Prudentius sein bedechtig vnd Christlich
redet / zuvertrauen. Was dem Grab befohlen vnd vertrauet / oder
wie S. Paulus 1. Cor: 15. redet vnd schreibt / in die Erden geseet
wird / das wird mit grossem gewin vnd wucher / Mit Carls gewichte /
bey eitel Centnern / Sagt der liebe alte Herr Mathesius / Seliger /
herfur kommen / vnd vns wieder gegeben werden zur Ewigen / herr-
lichen / frölichen / vnauflöschlichen / gemeinschafft vnd Beywohnung /
GOTT helff es vns allen mit freuden zuerfahren / Vnd tröste
vnter des vnd allezeit / mit seinem allein beständigen Trost / alle vnd
jesliche betrübt / trawrige hertzen / In denen / vnd allen andern fellen
vnd Nöten / Amen.

Weil dann nun Gestrenge Ehrentugentreiche Fraw / Auch
Edle vnd Ehrenvheste Jundern / Großgünstige Frawe / Christliche
förderer vnd gute freunde / Sampt allen vnd jeslichen Ewren Eh-
rentugentreichen geliebten Geschwistern / vnd die ganze Ewre Awe-
liche Freundeschafft / vñ Alles löbliches Geschlecht deren von Rositz
vnd Berzdorff / Ja Land vnd Städte in diesem Marggraffthumb /
ein solcher ebenharter vnuersehner Todesfall auch betroffen / vnd
Gott euch vñ vns heimgesucht hat / mit dem Tödlichen abgang / das
Gestrenge

Gestrenge Edelen vnd Ehrenhesten Herrn Casparn von Noßis
auff Jamen/2c. Ewres herzogeliebten/Chmans/Vaters/Haus-
wirttes/Berwandten / gesreundten / vnd *Patriis patrie*, da ihr vnd
mancher frommer Christ neben euch befunden vnd erfahren habt/
vnd noch fület / Ja diß Land vnd wir / werdens nicht alle so bald
vnd kürzlich verschmirzen vnd vergessen / was sein / einer solchen
fürnehmen nützlichen Person/Tödelicher / aber gar Christlicher Ab-
gang/für leid vnd schmerzen gebracht vnd gewireket / ist mir ohne
noth/von einem handel/den die erfahrung bas lehret / denn ich be-
dencken vnd schreiben kan/viel worte zumachen.

Vnd denselben alten/löblichen guten Christlichen vnd nöti-
gen brauch vnd gewonheit/am tage des Begrebnüs vnd bestattung
seiner Christlichen vnd in Christo seligen Leich vnd Cörper / der
Predigt halben/in einer gar löblichen Adelichen Christlichen grossen
frequenz vnd versamlung auch gehalten / Vnd zur selben Predigt/
mich vnwürdigen/Vngeschewet meiner / einem jedern wolbekant. n/
Auch von mir selbst/allweg vnd für jederman/gestandenen vnd be-
kandten/*simpliciter* vnd einfalt in Christo/erwehlet/beruffen vnd ge-
braucht. Vnd nicht allein von E. G. sondern sonst von vielen
andechtigen fromten Christen/Beide des löblichen Adels vnd andern
Erbaren Personen/bey mir angesucht ist worden / Dieselbe Pre-
digt schriftlich zufassen/vnd öffentlich in Druck zuuerordnen.

Vnd ob ich wol allerley bedenkens / vnd meins theils vrsach
gehabe solchs nicht zubewilligen / Dann ich sehe vnd erfahre wol/
vnd Je lenger Je mehr/was ich vnd meines gleichen / Alte vnd ein-
feltige/bey vielen jeziger Welt/Leuten/beide Mündlich vnd schrift-
lich mit Lehren vnd Predigen / Straffen/Drewen/Bermanen/
Warnen/Erinnern/Wie S. Paulus seinen *Catalogū*. 2. Tim. 4.
nach einander anordent vnd stellet/gutes schaffen oder aufrichten/
Man mein es gleich so herzlich vnd treulich/mit einem jezlichen/
als man immer kan vnd mag. Aber ich bedacht vnd erinnert mich
wiederumb/meines vnuorsehnen/ordentlichen/vnd derwegen Gött-
lichen

lichen beruffs. Umb der Welt willen (dachte ich) etwas weder ge-
than noch gelassen / Weil so Erbare / Christliche / fromme Leute /
allerley Standes vnd Geschlechtes / furnehme Personen / an deiner
Einfalt / nach so ein wolgefallen haben / furnemlich am Wort Got-
tes / vnd der alten Lutherischen / Seligmachenden Evangelischen /
nun mehr verachten / Ehr vnd warheit vnsrer Christlichen Religi-
on / Vnd wilt in G. D. Namen dis geringe Pfündlin / deinem
Herrn / Vnsrem Heiland Christo zu ehren öffentlich / dahin geben /
Wer weis / was Gott durch seinen Heiligen Geist in vielen Christ-
lichen herzen bey Jungen vnd Alten mit dieser einfalt wirken vnd
aufrichten möchte / Weil er zu S. Paulo selber sagt / *Virtus mea in
infirmitate persequitur*. Meine Stercke ist in schwachheit / mechtig etc.

So hab ich nun den Concept derselben gar schlechten vnd ein-
feltigen Predigt / bey meiner weile / in grosser vnmuß / wieder herfur
gesucht / Vnd also gestellet / wie man hie zusehen hat / Hab auch et-
liche ding ein wenig ausführlicher gemacht / vnd mit guttem willen /
etlicher Christlicher furnemer Personen / dis löblichen Marggraff-
thumbs / gedacht / Bey vns auff Erden / auch zu deme zuhelffe / Was
David Psal. 112. sagt *In memoria aeterna erit iustus*, Das frommer
Christlicher Leute gedechtnus / bey vns vnd den nachkomenden / er-
halten werde / Vnd ihrer trewen dienst vnd wolthaten (Wiewol sie
auch / so wenig als ich oder ein anderer / jederman zu sinnen werden
gethon haben / oder thun können) nit so leicht vnd bald / wie one das /
leider vberal geschihet / vergessen werde / Vnd hoffe / Es werde G. G.
vnd niemand entgegen sein / Sondern viel mehr zu wolgefallen vnd
ehren gereichen.

Das offerir / bringe vnd vberantwort Nu / G. G. vnd vnter
derselben löblichen Namen / beider alter Adlicher grosser Geschlech-
te / deren von Nostritz vnd deren von Bersdorff (andere hirmie vn-
übergeben / viel weniger verachtet) allen frommen Christen / Edelen
vnd Vnedelen in allen Stenden / Ich / in meiner alten trew vñ ein-
falt / Damit ich meinem lieben Herren Christo / vnd seiner Heiligen
Gemeine /

Gemeine/allezeit zudieneu schuldig vnd willig bin. Vnd bitte vn-
 erdinstlich vnd freundtlich/ Ewer Bestrengheiten/vnd alle vnd jeh-
 liche andere Christen/vor die es kompt. / Sie woltens/mie Christli-
 cher gunst vnd guttem willen (Ob sie gleich bey der Predigt Per-
 sönlich damals nicht gewesen weren) auch nun Schriffelich nicht
 anders/ Dann wie es / mie vnd gegen einem Jeden gemeine / Auff
 vnd annehmen. Wie es aber gemeine/ Darff bey Christlichen leu-
 ten/ferner kein erklerung/Nach dem alten Sprichwort: *Intelligen-
 tibus satis dictum*. Vnd Christlichen Leuten ist gut Predigen: *Can-
 didi, omnia candidè accipiunt & interpretantur*.

Vnd hoffe/dienee diese *editio* sonst nicht mehr / So werd sie
 doch zu dem dienen/ Das dieses Christlichen / vmb dis Marggraff-
 thumb vnd vns alle woluerdinten erewen Mannes / Beide seiner
 Erbarkeit vnd wolehaten / dester weniger bey den Nachkömmlingen
 vergessen werde / Nach dem vorgehorten Worte Gottes vnd
 Dauides: *In memoria aeterna erit iustus*, Des Gerechten wird (ja sol)
 nimmermehr vergessen werden/weder hic/ nach dort. Dann wie-
 wol solche Predigten vnd Schriffteen/von vielen/Wann sie sie ein-
 mal vberhin angesehen vnd kümmerlich durchlesen haben / *non sine
 supercilio*, inn winckel geworffen werden / So werden sie dannoch
 bey eslichen bleiben/ Oder von den Nachkomenden im winckel ge-
 funden vnd wieder herfur gezogen/gelesen/vnd also des gerechten
 nicht vergessen werden.

Wie dann dieser frome Selige Herr Caspar von Nostritz / re-
 cone heuchelei die warheit zurümen) solches gedechenus vnd rühms
 wol würdig ist/ Unzalbarer Christlicher vrsachen / ~~ihm~~ allein seines *nicht*
 verdinsts vnd wolehaten halben gegen menniglich / Sondern auch
 seiner pietet, Gottes furcht/Andacht vnd Erbarkeit halben. Dann
 als ich unwirdig/ In seiner / vnd nuhmals Ewrer / Ordenelich vnd
 wolerbawten Behausung zum Jamen gewesen / Hab ich das son-
 derlich mit herzglicher grosser lust vnd freuden an / mit verwunde-
 rung gesehen/dermassen in acht genomē/vnd meinem herzen einge-

B

bildet/

Bilder/ Das Ichs gleich täglich fur Augen sehe vnd bedencke/ Wie
kein Gemach vnd winckel (in denen ich gewesen) zweiffel nicht im
gansen Gebäude/durchaus also sey/ Da nicht (mit leichtfertige / wie
man leider an vielen orten findet) Sondern eitel Christliche schöne
Gemelde/ Historien vnd Sprüche / aus Gottes Wort vnd Hei-
liger Schrifft/ mit schönem lesblichen Buchstaben/ zusehen/ vnd zu-
lesen gefunden werden/ Dergleichen ich nicht bald/ so gemein/ in ei-
nem Hauß gesehen. Das ist gar ein schöner (vnd wens die Welt
zubereden wer) der beste schatz / in einem wolgebaweten Hauße/
Vnd wolbestelter vnd angeordenter Kinder vnd Gesinde zucht/
auch wol aller frembder/ die Gastweis hienein kommen: Ewre G.
woltens vnd werdens ohne zweifel/ zum ewigen gedechtnus also er-
halten/ vnd eh: mehren / dann wenigern / Das wird euch Gott
vergeltten/ Vñ sampt allen Ewren nachkömmlingen/ von denen jr iß
nichts wisset noch sie kenne/ an Leib vnd Seel/ zeitlich vñ ewiglich/
durch seine Gnade/ segnen/ stercken/ vermehren vnd erhalten/ Amen.

Vnd weil nu Edler vnd Ehrenvhester Juncker Caspar vort
Rostig/ Gott der Allmechtige G. G. als den Eltern / dis Jar zum
Regiment vnd Haußhaltung / nach Ewrs geliebten vnd seligen
Heren Vater Tode/ versehen vnd geordene/ Das jr Ewrer hers-
geliebten/ vnd numehr wolbetagten vnd verlebten Frauen Mutter
in Ihrem Alter/ vnd Ewrer geliebten Brüder vnd Schwestern/ in
Ihrer Jugend / Wie die Heilige Schrifft vnd Gottes Wort re-
det/ Ihrer aller Stab sein sollet / Daran sie sich lohuen / Wünsch
G. G. Ich darzu von herren allezeit/ Gottes Gnade/ Segen vnd
alle wolfarth/ Werdet ohne zweifel / In Ewrs geliebten Herren
Vatern/ Christliche Fußstapfen treten vnd stehen/ Bey den vnter-
thanen für allen dingen / rechte Alte bewerte Euangelische Lehre
Sampt dem rechten einseitigen/ von Christo selber geordneten ver-
standt vnd brauch der Hochwürdigen Sacrament/ vnd rechte Got-
tesdienste fördern/ Vnd nicht achten/ was gleich Jest in der Welt/
bey vielen/ leider / in diesen hohen Sachen / fur eine gefehrliche vnd
fur

für G Dte vnd seiner waren Kirchen nachteilige vnbestendigkeit
vnd verenderung/zunehmen ist. *Verbum Domini veritas, & manet
& manebit in eternum, Esa. 40. Ioan: 6. 17.* Das lest Euch G Dte
sonderlich sein lieber Sohn Ihesus Christus hie vnd dort furwart/
nicht vnbzalt noch vnuergolten.

*Non perit, aut perijt verbum, nunquamq; peribit,
Hoc valet, hoc valuit semper, semperq; valebit. Amen.*

G DTE laß ihm in Christo das Haus Amen/ Ja fur vnd
fur auch Mich vnter denselben befohlen sein/Amen. Vnd befehle
mich in E. G. aller Christliches Gebet. E. G. sol in meinem Ar-
men Gebet/neben meiner/Mir vnwürdigen befohlen vnd vertrau-
ten Christlichen loblichen vnd Bürgerlichen Gemein/ Ob G Dte-
wil auch vnuergeffen sein. Geben in Budissin am Sonntag Judica
Des 1 5 8 7. Jahrs.

E. Gestrengheiten

Williger Diener.

Der Alee *LAVRENTIVS DRESSERVS*
Circaviensis, Vnwürdiger Prediger Göttlichen
Worts vnd Euangelions/daselbst.

Faint, illegible text, likely bleed-through from the reverse side of the page. The text is arranged in several horizontal lines across the page.



Kurzer Eingang vnd vermanung zum Gebet.

Nach dem vnd dieweil wir ihund //
im Namen des Allmechtigen / nach seiner
Göttlichen vernehmung vnd wolgefallen er-
schienen vnd versamlet seind / etwas aus
Gottes Wort / einander furzutragen / zu
Predigen vnd zuhören / Damit es nun beider seits frucht-
barlich vnd seliglich gescheen könne vnd möge / zu Göttli-
cher Mayestet Ehren / vnd vnser aller Trost vnd Heil //
Wollen wir vns für vnd gegen dem einigen / Ewigen / All-
mechtigen Warhafftigen Gott / der Hochgelobten All-
erheiligsten Dreyfaltigkeit / mit vnd nebeneinander vom
herzen demütigen / Vnd Gott den Himmlischen Vater //
In des Herren Ihesu Christi / seines lieben Sohnes / vn-
sers Ewigen / einigen Mittlers vnd vorbitters Namen //
hizu aus rechtem wahren Glauben / In Kindlichem
guttem vertrauen vnd zuuersicht / Durch ein andechtig es
Vater vnser / von herzen anruffen vnd bitten / vmb Gnad
vnd Beystandt seines Heiligen Geistes / vnd solches zuer-
langen mit einander Beten vnd sprechen / Vater vnser
der du bist im Himmel / 2c.

Der ander Eingang nach dem Gebet für
verlesung des Texts.

Wie

Wir haben jekumb / wie E. L. alle vnd jekliche wol
sehen vnd wissen / Das Geleit anher gegeben zum
Grab. Oder wieder Euangelische alte Prophet Esaias /
Ca: 56. Gar lieblich vnd tröflich redet / zu seiner lieblich
en Schlaffkammer vnd sanfften Ruhbette in Christo /
Nicht einem schlechten / Sondern einem furtrefflichen
Christlichen / bey Jederman vnd vberall Billich wolbe-
rumbten tapffern Man vnd woluerdienten Helden /
Nemlich / Dem Gesirengen / Edelen vnd Ehrenhesten
Herrn Caspar von Noßitz auff Zamen vnd Klitten / 2c.
Dem Eltern. Welchen der Allmechtige Gnedige Gott /
Nach seinem Gütlichen Rath vnd wolgefallen / Ihme /
Dem verstorbenen vnd in Gott ruhenden. Dann er ist nu
entgangen vnd weggerafft / derwegen wolgesichert vnd
gefreyet / für unzallbarem / künfftigem grossem vn-
glück / Jammer vnd Not / So die Gottlose / rohe / sichere /
Epicurische / vr busfertige Welt wie heffig zubeforgen /
in kurzer zeit vnd Jahren / schrecklich vberfallen wird /
Drumb sein seliger Abscheid / sag ich / Ihme / Aber leider
zu besorgen nicht vns / oder diesem Marggraffthumb /
zum besten geschehen / Da in G. D. / Am negsvorgange-
nen Sonnabend zu nachts / Vmb 11. vhr / Aus diesem
Elenden betrübten Jammerthal / In warhafftigen Er-
kennnis / vnd beständigem Bekentnis vnd herzlichet / Ans-
dehüger / Demütiger Anruffung / Bis an sein End vnd
auff den letzten Athem / des Ewigen / Ewigen / Warhaff-
tigen Helffers / Heylands vnd Seligmachers / vnsers lie-
ben

ben Herren Jesu Christ / Sanfft vnd seliglich / durch
den leiblichen vder zeitlichen Todt / abgefodert / zu seinen
Gnaden genomen / vnd inn Ewigen Fried vnd Ruh ge-
bracht / Vnd das ich wie S. Petro rede / transferiret vnd
versezet hat.

By welches Christlichen vnd in Christo / Seliger
Leich vnd Körpers / Ehrlicher Bestattung vnd Begre-
nüs / Dardurch wir ihme / In dieser Christlichen / Erba-
ren / gar löblichen Adelichen / Frequenz vnd versamlung /
den letzten schuldigen dienst vnd Treu / Vnsern Glauben
vnd hoffnung / von der Allgemeinen Auferstehung / wie
vnsers Glaubens Artikel redet / des Fleisches oder der
Toden am Jüngsten Tage / zum Ewigen / vnmengli-
chen wesen vnd leben / Auch vnsere lieb / Günst vnd dank-
barkeit / gegen ihm vnd den seinen für seine / Diesen Lan-
den vnd vns dielseltig beweiste Väterliche liebe / Treue
dinst vnd wolthaten / zuleisten vnd zuerzeigen / So wol
auch den Bestrengen / Edlen vnd Ehrenhesten / Seiner
Hoch vnd herzbetrübten / Nachgelassenen Wifrauen /
Kindern / Waisen vnd Erben / Neben dieses löblichen /
Alten / Wohlbenambten Geschlechtes / deren von Noth /
verwandten vnd Besreundten / zc. Zu trost vnd ehren
vnd diemilichem gefallen / Auch eine kurze Christliche
Leichpredigt vnd vermanung / für allen anwesenden zu-
hörern / aus Gottes Wort zehun / (wie es dann ohne
das / Gott lob Landüblich vnd gebreuchlich) begeret vnd
bejelleet ist.

So

So wollen wir zu derselben/durch Göttliche Gnad
vnd verleyhung/für vns nemen/einen kurzen lehrhafft-
gen / Geiſt vnd Troſtreichen Text / Aus der Epistel des
Hochberühmbten vnd bewerten H. S. Aposiel Pauli
an die Römer/Welcher Text vnd worte im 14. Cap. vn-
ter andern also ſehen vnd lauten.

Leben Brüder / Vnser keiner lebt ihme
ſelber / Vnd keiner ſtirbet im ſelber / Les-
ben Wir / ſo leben Wir dem H. Erren / Ster-
ben wir / ſo ſterben wir dem H. Erren / Da-
rumb wir leben oder ſterben / So ſeind Wir
des Herren / Dann darzu iſt Chriſtus auch
geſtorben vnd Auſferſtanden / Vnd wieder
lebendig worden / Das er vber Todte vnd
lebendige Herre ſey.

GOTT der Vater verley vns darzu ferner / Auff
allen teilen Gnad durch Seinen Heiligen Geiſt/
Vmb des H. Erren Iheſu Chriſti willen / Amen.

Kurze vnd Einfeltige / Aber doch Chriſt-
liche erklerung/des abgeleſnen vnd ange-
horeen Textes.

Wiewol man/Ir geliebten vnd auſerweltsen Got-
tes in Chriſto/bey dieſem Aposioliſchen Text vnd
worten/

Worten/wol von dem allein/eine zimliche lange Predigt
zuthun hette/ Das man die einfeltigen Christen vnd liebe
Tugent vnterrichtet / *de nativa sententia* / vom rechten / ein-
feltigen verstand vnd meinung/des heiligen Pauli / wie
sie sein ordentlich vnd wolgerembt/auff den andern fur-
gehenden Text/auff die *antecedentia* gehen vñ folgen/ Weil
aber ihunde weitkufftig dauon zureden / weder zeit noch
gelegenheit vorhanden ist/ Sol vnd mus es an dem gnug
sein / das wir zum anfang oder etngang dieser Predigt/
nur den Inhalt desselben / auff aller kurtzte vermelden/
Vnd denn sehen / was der Apostel ferner lehre / vnd wie
vns dieser Text vnd wort/ Auff diesen vnd andre derglei-
chen betrübe vnd trawrige felle / Die sich mit vns / vnd
allen Menschen / zu allen zeitten vnd stunden / auch bey
gesundem leibe / durch Gottes gerechtes verhengnis / zu-
tragen vnd begeben können/ Durch gnad des heiligen Gei-
stes / zur lehr vnd trost / Beide fur vnd fur / nach Gottes
Geboten / gegen Gott vnd Menschen ein Gottseliges le-
ben zufüren / Vnd dann / wens Gottes wille / vnd vnser
Sündlin vorhanden ist / frölich von hertzen willig vnd
gerne / vnd im HErrn / mit dem herrn Caspary von
Nostitz/auch seliglich zusterben/nützlich vnd diensilich sein
können.

Was nun Ersilich / die Summ vnd Inhalt dieser
Wortte/in Ihrem einfeltigen verstande / nach der furge-
henden meinung des Heiligen Pauli belanger/vnd wie sie
G gar

gar ordentlich vnd wol / auff die vorigen wort vnd lehre folgen / Damit helet sichs auffo fürzte zumelden also.

S. Paulus hat zuuor gelehret / Wie man sich vmb der Einfeltigen vnd schwachen willen; im Glauben (Merck / der Apostel redt alhir nichts von den muthwilligen / störrischen Sophisten vnd werckheiligen / die die leer des Heiligen Euangelions für vnd für verachten / lestern vnd in Ihrem Aberglauben halßstarrig sein) Sondern von den einfeltigen / noch schwachen im Glauben / redet vñ lehret er / wie man sich vmb derselben willen / im brauch der Christlichen freyheit / sonderlich *in Adiaphoris*, eusserlichen oder Mitteldingen / Nach Gottes willen / Nach des rechten Glaubens vnd Christlicher liebe Art / auch Christlich vnd Brüderlich / erzeigen vnd verhalten solle / Hiermit man durch den schendlichen Mißbrauch solcher freyheit zum Fleischlichen muthwillen / Die schwachen im Glauben nicht ergern / vnd vmb eins geringen vngesehrlichen dings willen / nicht ganz vnd gar von der Wahrheit Christi / vnd Seligmachenden lehr des Heiligen Euangelions abschrecken möchte / Welche schwachen vnd anfangenden im Glauben / Der Heilande Christus / Eben so wol als die starcken / gar thewr / Nicht mit vorgenglichen Gold oder Sylber / Sondern mit seinem vnschuldigen Bittern Tod / vnd Rosinfarben Thewren Blut / am Creuze / Erarnet / Erlöset / Erkauft / Erworben vñ gewonnen hat / Wie vnre liebe Kinderlein / in andern

dem

dem Haupt Artikel unsers Heiligen Christlichen Glaubens. vns aus GOTTES Wort/ sein lieblich / verständlich vnd tröstlich erinnern.

Lehret derhalben / Damit der Apostel / Wie wir vns in all unserm wandel/ Wesen vnd leben/ Worten vnd wercken/thun vnd lassen allenthalben verhalten / Nicht auff vns allein / Nicht auff unsern nutz / lust vnd willen/ Sondern auff Gottes Ehre / Befehl vnd willen / allein sehen sollen/ Dann wir seind nicht vnser selbst / oder vnser eigne Herren/ Die mit jederman vmbgehen/ oder ohn vnterscheid thun vnd lassen mögen / Was vnd wie wir wollen/ Sondern wir seind als die erkauften vnd Erlösten/ In der Allmechtigen Hand/ Gewalt vnd willen Vnsers Erlösers / des Eingebornen Sohns Gottes vnd Mariæ/ Des Herren Ihesu Christi / Dem Gebürt alle Ehre/ Danck vnd gehorsam / Wie die Kirch sein singet/ *Redemptori Domino redempti subilemus.* Vnd der Alte Zacharias Joannis Baptistæ Vater / Vns sein erinnert / Luc. 1. Er hat vns Errettet von unsern Feinden / vnd aus der Handt aller die vns hassen / Das wir ihm dieneten ohne furcht / vnser lebenslang / In Heiligkeit vnd Gerechtigkeit / Die ihm gefellig ist. Vnd dieser dienst oder *seruitut*, Nemlich / Nicht noch seinem eignen Gutdüncken Oder muthwillen / Sondern nach eines Andern **H E R R E N**/ Nemlich / Nach **G O T T E S** Befehl/

S ij

wort

Wort vnd willen/gegen Gote vnd Menschen leben/thun
vnd lassen/ist *Vera libertas*, die rechte freiheit/wie die Kirche
bekennet/*Deo seruire regnare est*, Gott dienen/heißt herrschen
Vnd doch dabey ein rechter Freyherr/sein vber seine fur-
nehmste Feinde / Sünde / Todt / Teuffel/ Welt/ Fleisch/
Helle/Verdammis / 2c. Von welcher freiheit Christus
trösilich sagt/Joan: 8. *Si filius vos liberauerit, Verè liberi eritis.*
Wenn euch der Sohn freymacht / So werd jr recht frey
sein. Vnd hindere an solcher freyheit nichts / das wir
gleich dem schwachen im Glauben/etwas/so nicht wieder
Gottes Wort vnd ordnung ist/aus liebe/ Damit wir ja
nicht ergern/gut sein lassen vnd vertragen.

Darauff geht vnd folget / wie ordentlich/ also auch
woluerstendlich / Was S. Paulus im verlesnen Text
weiter sagt/Vnd gleich die vrsachen sezet/ Warumb wir
der Christlichen freiheit / nicht mißbrauchen sollen zum
fleischlichen muthwillen / Dardurch der negste / wie der
Apostel redet/geergert vnd verderbt möcht werdē/ Dann
vnsrer keiner lebt ihm selber/vnd keiner stirbet ihm selber/
Summa/wir seind eins andern Herrn/vnd nit vnsrer selbst/
Non nostri iuris, also zu reden. Nun von dem dißmal genug.

Weil S. Paulus hie redet vnd zuthun hat/mit den
Ernewten vnd wieder gebornen / Mit den Gleubigen/
vnd durch den Glauben an Christum / mit Gott ver-
sünten / Bekerten vnd Gerechtfertigten außewelten
Christen vnd Gnaden Kindern Gottes / So haben wir
hie

hie Innsonderheit mit höchstem fleiß zubedencken vnd
wol zu lernen Dreyerley.

Erstlich/ Das kein rechter Christ im selber nicht le-
bet/ auch ihm selber nicht stirbet / Vnd was da heisse ihm
selber leben/ oder ihm selber sterben.

Zum andern/ Was man denn dauon für vnaus-
sprechliche grosse freude/ nutz vnd frommen hat / Wenn
ein Mensch nicht ihm selber/ Sondern seinem H Erren/
der ihn so tewr erlöset vnd erkaufft hat/ Das ist/ dem etni-
gen Heiland vnd Seligmacher Ihesu Christo / beide le-
bet vnd stirbet/ Nemlich/ Das er der seine / Seines Her-
ren/ ist vnd bleibet / Beide im leben vnd Tode/ vnd dann
Ewiglich.

Zum dritten/ Wardurch wir des alles als/ des höch-
sten Guts vnd besten Schakes / versichert sein/ Nemlich/
durch den vnschuldigen Tode / vnd Rosenfarbes Bluu/
Durch die herrliche Auferstehung vnd Himelfart/ Un-
sern lieben Herrn vnd Seligmachers Ihesu Christi / der
hats nicht ihme/ Sondern Uns/ Uns/ aus lauterer Gnad
vnd Barmhertzigkeit verdient/ erworben vnd geschencket.

Darbey wir dis alles/ auffo kurtz / nie vnbillich/ ap-
pliciren sollen vnd wollen / auff diese In Christo selige/
vnd nun in Gott sanfft/ ruhende Person den Herrn Ca-
parn von Nositz/ 2c. Wie er sich nach dieser lehre / durch
Gnad des Heiligen Geistes/ sein lebenslang / Bis in den
letzten Achem vnd an sein seliges Ende / so viel in ange-

borner Menschlicher schwachheit/ Immer möglich gewes-
sen/ In Gottes furcht vnd aller Gottseligkeit/ Gottlob
gar Christlich vnd wol verhalten habe/ Vns zum Exem-
pel/ Dem wir im guten nachfolgen sollen vnd mügen/
Maiores enim vestigia sunt imitanda. si recte praeferunt.

Welches alles sich/ die Geseirenge/ Edle vnd Ehrentu-
gendisame Frau Anna geborne von Berßdorff/ Seine
hinterlassne herzberrübte Christliche Wittfrau/ Sampt
Ihren auch Berrübten Kindern/ vnd/ vielleicht, eins teils
noch vnerzognen Waisen/ Die ganze Erbare Freunds-
schafft/ Des löblichen Adeltichen/ alten grossen Geschlech-
tes/ Deren von Rositz/ Vnd wir alle/ als Christen Nem-
lich seines Christlichen wandels vnd lebens/ vnd hierauff
erfolgten seligen Abschieds halben/ vnd wegen seiner In
Christo gewissen seligkeit/ In hoffnung der frölichen Au-
ffersiehung/ mit verflertem leibe am jüngsten Tage zum
Freudenreichen Ewigen leben/ Hochlich zu trösten / vnd
drauff seinem Christlichen Exempel sicherlich vnd selig-
lich zu folgen haben / Dann wenn der Mensch gestorben
ist/ Sagt Sprach/ so wird man erst innē/ Da brichts erst
recht herfür/ wer er gewesen ist/ Vnd wie er gelebet habe.

Ersilich saget der Apostel also/ Unser keiner le-
bet ihm selber/ Vnd keiner stirbet im selber/
Hie zeigt S. Paulus Ja sein deutlich vnd klerlich an/
Was durch gnad des H. Geistes/ die art vnd eigenschafft
sey/ der rechtbekerten/ gleubigen Christen/ der warhafftigen
gen

gen Gnaden kinder Gottes / Die warhafftig (nicht allein
eufferlich im schein vnd ruhm / Wie die Heuchler vnd
Maulchristen / Sondern warhafftig / sag ich) im Geist
ihres gemütes / wie S. Paulus anderstwo redet / erneu-
ert / vnd widergeboren seind / Die der Geist Gottes / in ges-
danken / wortten / wercken / wandel / wesen / leben / geber-
den / etc. regieret vnd treibet / dauon S. Paulus Rom. 8.
saget : *Qui spiritu Dei aguntur, hij sunt filij Dei*, Die der Geist
Gottes treibet / die seind Gottes Kinder. Vnd kurz zu-
uor : Wer aber Christi Geist nicht hat / Das ist / Von ihm
nicht regirt vnd getrieben wird / Sondern von einem
frembden / Als von seinem eignen / oder einem andern
Geist / der nicht mit Christi Geist / Wort / Lehr / Leben zc.
Vberein tregt oder stimmt / Der ist Christi nicht / Denn
Christi Geist / führet vnd treibet zum gehorsam / Göttli-
cher Gebot / gegen Gott vnd Menschen / vnd sonst durch-
aus im Wandel vnd leben zu allem gutten / auch zu zucht /
erbarkeit / zc. Das also derselben keiner ihm selber lebet /
noch ihm selber stirbet / Sondern leben sie / so leben sie dem
Herrn / Sterben sie / So sterben sie dem HERN / Das
ist / Seind allewege Gottes bereitte / gehorsame / willige
diener / Wie auch dargegen die Gleisner / Heuchler vnd
Maulchristen / Ihren Herren / dem Teuffel / Der Welt /
Seinem Fürstenthumb vnd hoffgesind / so wol / auff alle
Sættel / zu allen dienien / Fertig / willig vnd bereit sein /
Dafür Gott / ons alle / vnd zu allen zeiten / mit Gnaden
behüte vnd beware / Amen. Was

Was heisset aber / Ihm selber leben vnd ihm selber
sterben: Wiewol etwas dauon geredt ist / Möchte doch
den Einfeltigen / vnd der Christlichen Jugendt / noch zu
einfeltig vñ vnuerständlich sein vernunfts der wegen ein
wenig klerer vnd deutlicher / Ihm selber leben / Heisset
sich Blos vnd allein / nach Gottes Wort / Befehl vnd wil-
len / nicht alleine nicht richten / noch halten / Sondern der
klugen vernunfft / Seinem eignen kopffe vnd gutdüncken /
Rath / Kunst / Geschickligkeit / Weißheit / Krefft / Ver-
mögen / 2c. Vnd in Summa / dem grossen Hauffen / Der
rhumretigen / prechtigen Weltkinder / In Lehr vnd leben /
So viel vnd wol mehr glauben / trawen vnd folgen / als
Gott / seinem Heiligen Wort / Ordnung vnd befehl.
Welcher Leute / oder wie sie Lutherus nennet / Juncker
Ladünckel / Vnsere Deutschen heissen sie / Meister klüg-
ling / (ders Pferd / weis nit wohin / zeumet) Die Welt /
zu vnserer zeit in allen Winckeln füet vol vñ / welche auch in
Kirchen vnd Schulen / vnd sonst in Summa durchaus
in allen Regimenten vnd Stenden / im gantzen handel /
wandel vnd leben der Menschen / Allen grewlichen Lehr-
men vnd zerrüttung / Das wilde / rohe / sichere / Epicuri-
sche / ergerliche / verdamliche / Vnd / mit einem wort zu re-
den / Sodomische wese / So leider in der Welt ist / Ver-
achtung Gottes / Seines Worttes / Zucht / Erbarkeit /
Tugenden vnd aller guten Ordnungen / justen / anrichten
vnd einführen / Darüber Gott vnd alle Engel im He-
mel

mel / vnd Gottes außerswelte Gnadenkinder auff Er-
den / vnd neben ihnen alle Gottfürchtige / vernünftige
Menschen / klagen vnd schreyen / Hilfft aber ahn vnd bey
den Gottlosen lauter nichts / Lachen vnd spotten Gottes
vnd vnser nach darzu inn die faust nein / Bis ein mahl der
höchste Gott selber auffwachen / mit donner / Blix / Pestil-
lenz / Hunger / Thewrung / Krieg / 2c. Vnd allen Plagen
in hauffen schlagen / vnd straffen wird / Das sie das lachen
vergehe / Wie zuuor / von anbegihn her / auch gescheen ist /
Als viel Exempel vnd Historien / Frommen fleissigen
Christen / Gottlob / bekant sind / Dann ist von nöhten
ist / dieselben in dieser kürze zumelden.

Was sollen sie aber entlich dauon bekommen vnd zu
lohn haben: Eben das / Wie sie ihnen selber / vnd nit Gott /
noch seinem Sohne Christo / noch dem Heiligen Geiste /
geglaubet / gefolget vnd gelebt haben / Nach all irem mit-
willen vnd wolgefallen / Also werden vnd sollen sie auch
nicht Gott / nicht Christo / nicht dem heiligen Geiste / son-
dern ihnen selber sterben. Ach das ist erst ein rechter gros-
ser Jammer vnd Elend / Noth vnd gefahr / (Ihm selber
sterben.) Aber die kluge Welt / Solts nicht eher glauben /
bedencken / vorsiehn noch folgen / Bis sie es erfahre / Vnd
Ir der Glaube / In die hand komme / Mit Ihrem vnuer-
windtlichen schaden / Wo nicht mit genzlichem / Ewigen
vntergang vnd verterben / Leibs vnd Seele. Dann die
rechnung können wir Ja leicht vnd wol machen / Das der
vntergehen vnd verterben mus / Der nicht dem H Erren

in seine schoß / Sondern ihm selber stirbet / Wie er nur
ihm selber gelebet hat / Denn ein solcher kan ihm Ja / vnd
sonderlich damals / In dieser aller höchsten noth vnd ge-
fahr / selber nicht helfen. Solches alles / kan aus der
Antithesi vnd Gegentheil / Die bald folgen wird / Noch baß
vernomen vnd verstanden werden / Vnd souiel vom ersten
Stück des Texts / Unser keiner lebet ihm selber / Vnd kei-
ner stirbet im selber / Vnd Gott helff / Das es mit vns
allen also auch geschehe / Amen.

Vom Andern Stück.

Der Apostel hat ikt gesagt / Das kein rechter Christ
vnd Gnadenkindt Gottes / Ihm selber weder lebe
noch sterbe / Das ist / Nirgends sein eigne Ehre / Ruhm /
nuß noch frommen / Sondern vberal vnd vor allen din-
gen Gottes ehre / Der Christlichen Kirchen vnd Ihrer
Glieder / Seines Neigste / Das ist / aller Menschen / Lu. 10.
Dne vnterscheid vñ ansehen Freundes / oder feindes vñ so
fortan / Nuß vnd frommen / gedeyen wolart vnd förderung
suche / vnd betrachte / Folget / Das alle Tyrannen /
Egennütziige / Neydische Leute / Buchrer / Geizhelse / E-
picurer / 2c. Die nur / wie der Wolff im Walde / Inen sel-
ber leben / eintragen vnd zusammen sbarren / krummen
vnd kraken / 2c. Zumliche Christen sein müssen / Ob sie
wol mit vollem Maul / Gott / Gottes Wort / den Glau-
ben / Christliche liebe / gutte wercke / 2c. rühmen Die sonst
billich zu rühmen vnd zu Preisen sein. Was sagt aber
von

Von vnd zu solchen Leuten/der H. Geiſt/1. Ioan. 3. ſpriche
er alſo: Wenn jemandt dieſer Welt güter hat / vnd ſihet
ſeinen Bruder darben / vnd mangel oder noth leiden / Er
aber ſchleuſt ſein hertz vor ihm zu / Wie der Reiche Man
vor dem Armen Lazaro / Wie bleibet die liebe Gottes in
ihm: Dann ſo er / ſpricht er hernach Cap. 4. Den nicht
liebet / Den er für ſeine Augen ſihet / des Armut / Krauck-
heit / Not vnd Wehklagen er ſpüret vnd höret / Wie kan
er Gott lieben / den er nicht ſihet: Ein ſolcher ſtirbet / dann
auch nicht Gott / Sondern im ſelber / Ja / Welchs das al-
ler erſchrecklichſie iſt / allen Teuffeln heim / Wie man des
alles Exempels vnd warnung gnug hat / Nur am Gottlo-
ſe / vnbarmerhertzigen verdampften reichen Man / Luc. 16.

Ein rechter Chriſt aber / ſagt S. Paulus im Text
weiter / lebet erſilich dem Herren / Das iſt / Er richtet vnd
helt ſich durch Gnade des H. Geiſtes / für vnd für nach
Gottes Wort / Lehret vnd tröſtet ſich mit vnd aus demſel-
ben / in vnd vnter all ſeinem Kreuz vñ trübfal / Darnach
in allen ſeinen gedanken / wortten / wercken / wandel / we-
ſen / leben / geberden / in allen ſeinem thun vnd laſſen / Zeigt
er ſein Licht / Seinen glauben / gegen Gott vnd Menſchẽ
leuchten vnd ſcheinen / Bis an ſein ſeliges Ende / Soutel
durch die Gnad des Heiligen Geiſtes / In Menſchlicher
ſchwachheit / In dieſem leben möglich / Nach des bekerten
lieben Davids Exempel / der da ſagte Pſalm / 119. *Lucerna
pedibus meis verbum tuum, & Lumen ſemitis meis: Dein wort
iſt meines Fußes leuchte / Vnd ein Licht auff meinen
wegen.*

D ij

Dann

Dann erstlich / Nimpt ein rechter bestendiger Christ /
keine andere lehre / keinen andern verstandt noch brauch
der Hochwirdigen Sacrament an / Henget keinem an-
dern Gt und Gottesdinst an / Dann ihn der einige Es-
wige Allmechtige Warhafftige Gt / Nemlich / Der
Vater durch seinen gesendten / vud krefftig erweisen lie-
ben Sohn Jesum Christum / Sampt dem H. Geiste ge-
lehret hat / vud solche lehre täglich (im sey lob vud danck)
vnter allem Creutz / verfolgung / lesterung / 2c. Repetirt /
wiederholt / vud gar Wunderberlich vud gewaltig-
lich erhelt / Ob vud von welchem Christo vud was er ge-
redt / gelehrt vud geordnet hat / alleine / Gt der Vater /
ausdrücklich vud ernstlich / Deut: 18. Matt: 17. befihle
Den solt jr hören / Darinn vud darauff bestehet vud
beruhet eines Christen Glaub / vud gleubiger / williger
Gehorsam / bis an sein Ende / Welcher Glaube / Ihme
durch Gttes Barmherzigkeit / vmb Christi verdinstis
vud gehorsams willen / nach seiner Gnedigen zusage / mit
dem Gleubigen Abraham / Rom: 4. Gal. 3. gerechnet
wird zur Gerechtigkeit.

Darnach was die Frucht des Glaubens / seinen wan-
del / wesen / leben vud werck / den Newen Gehorsam / 2c.
belanget / Helt er sich gleicher gestalt / Aber nicht aus eig-
nem verstand / krefften vermügen / 2c. Sondern / wie ich
droben gesagt habe / Soutel in dieser schwachheit des bluts
vud Fleisches / durch Gnad vud regirung des H. Geistes
möglich / Auffß aller eigentlich sie vud genawße / auch zum
wortte

Wortte vnd nach dem wortte / Als nach dem rechten Pro-
phetischen vnd Apostolischen festen wort vnd Gründe / 2.
Petri 1. Hütet sich fur allen muthwilligen Sünden / In-
nerlich vnd eusserlich / heimlich vnd öffentlich / fur Erger-
nis vnd allem bösen / Lebet messig / nüchtern / züchtig / still
vnd Erbarlich / Dann er weis / Das der höchste Gott dis
alles gar ernstlich erfordert vnd haben / Sder nach ge-
rechtigkeit wieder alle Sünd vnd vnordnung ernstlich
zürnen vnd erschrecklich straffen wil / Exod. 20. Es siehe
gleich lang oder kurz an / Ja ein recht bekeerter / warhaff-
tig im Geis Erneuter vnd wiedergeborener Christi / weis /
bedenckt vnd Bekent / Das wir GOTT / diesen gehorsam
vnd danckbarkeit: Ro: 8. Nemblich / Das wir nicht nach
dem Fleische / Sondern nach dem Geis leben / Bey ver-
lust seiner hulde vnd der ewigen Seligkeit / schuldig seint /
Darumb auch Christus Matt. 5. gebeut. Lasset Ewer
Licht also leuchten fur den Leuten / Das sie Ewre gute
wercke sehen / vnd Ewren Vater im Himmel Preisen.
Dan / Es werden / Sagt er hernach Matt. 7. nicht Alle /
die zu mir sagen HERR / HERR / in das Himmelreich kom-
men / Sondern die da thun den willen / meines Vaters im
Himmel. Das hört vnd weis Gottlob vnser Welt / in allen
Stenden sehr wol / Aber wer gleubts herzlich: wer be-
dencks ernstlich: Wer richtet sich in Gottes furche darnach
gehorsamlich / zu rechter zeit: S leider zu allen zeitten
sehr wenig / GOTT stercke / vermehre vnd erhalte sein ge-
horsames kleines heufflin / Amen.

D iij

Was

Was hat den nun ein Christ/von solchem Glauben/
Wandel vnd leben/Das er nit ihm selber/Sondern dem
Herren lebet vnd stirbet/Welches in ihm ein werck ist/frei-
lich nicht des freien willens / Nicht Menschlicher Weiß-
heit / Krafft vnd vermögens / Sondern ein lautere gab
Gottes vnd Gnadenwerck des Heiligen Geistes.

Das meldet S. Paulus in diesen kurzen / Aber
sehr schönen lieblichen / Geist vnd Trostreichen wortten/
Wir leben oder sterben / So seindt wir des
Herrn / Ach welch ein Herrlicher Schatz vnd Trost ist
das / Wer kan ihn ergründen oder außsprechen / Beide
im leben vnd Tode / Gottes des Ewigen Allmechti-
gen Herrn sein vnd bleibe. Vnd das kein ander wiederwer-
tiger Herr v e / kein Feind / keinen zutritt / zu ihm keine macht
noch gewalt vber ihn / haben kan noch sol. Menschliche / Ja
aller Engel vnd Creaturen hertzen / verstand vnd zungen/
seind hie viel zu wenig vnd zu schwach / Ach das wirs ein
wenig verstünden beherzigten vnd bedechten / Wie wür-
den wir dem H. Geist / so gehorsam / so gleubig / so Gott-
fürchtig / so Undechtig / so from / In allem Creutz getrost /
geduldig vnd vnuerzaget sein.

Der liebe Lutherus / hats ihm sein gewisi nutz zuma-
chen / Vnd vns damit eine Anleitung gethan / vnd gege-
ben / Wie wir ihm in aller Gottseligkeit / weiter fleissig vnd
trewlich nachdencken kondten vnd solten / Do er in der
Trostschrift an den Francken Doctor Joanni Kühel also
schreibet /

schreibet / *Sine vivimus siue morimur Domini sumus* Ja verē *Domini*
ni, in Genitiuo & Nominatiuo : *Domini* in Genitiuo singulari, *Quia ipsi*
us domus, imo membra sumus. *Domini* in Nominatiuo plurali, *Quia*
regnamus super omnia per fidem, quae est Victoria nostra, Deo gratia, &
conculcamus Leonem & Draconem. Summa: *Confidite* (ait) *ego vicē*
Mundum. Das ist / Des Herren feind wir / Dann wir
feind sein Haus vnd Wohnung / Ja seine Glieder. Herren
feind wir selber / Dann durch den Glauben herschen wir
vber alles / Welcher Glaub / Gott Lob vnd danck / Unser
Sieg ist / vnd treten auff Löwen vnd Trachen. Sum-
ma / Er sagt selber / Seid getrost / Ich hab die Welt vber-
wunden.

Sehet hertzliche Christen / Das haben wir dauon
vnd sollens haben / durch Gottes Gnad vnd Barmher-
zigkeit / vmb Christi willen / Wann wir vns allezeit den H.
Geist regieren lassen vnd Ihm folgen / Gleubig / Sit-
fürchtig / From / GOTT vnd seinem Wort / vnd offen-
barten wolbekandten willen gehorsam sein / Alle muth-
willige Sünde darzu Vns der Teuffel / die Welt / Vnd
vnsers schwaches Fleisch vnd Blut / für vnd für reizen /
Fleißig vnd treulich / fliehen vnd meiden / Den hinder-
stelligen bösen lüsten vnd begirden / widerstreben / Den
Alten Adam / Wie Sanct Paulus anderstwo redet /
dempffen / Kreuzigen vnd Todten. Gal. 5. Summa /
Wie den fünffklugen Jungfrauen Matth. 25. Lampen
vnd Del / Glauben vnd gutt Gewissen / Bis an vnser
Ende / Mundter vnd treulich Bewaren / 1. Timoth: 1.
Capitel.

Das

Das findet vnd erweist sich hernach alles fein/bel-
des im leben vnd sterben / Im Creutz vnd Todes kampff/
am letzten End vnd Todes Stündlin. Wie man fein si-
het in den Historien der Heiligen Patriarchen vnd Erz-
väter/Die haben alle/allein auff diesen Herren/ein seligs
End vnd abschied gebeten vnd bekommen / Dem sie gelebt
haben/Dem seind sie auch fein sanfft/seuberlich vnd seligs-
lich eingeschlaffen vnd in die Schoß gestorben. Haben
mit David/voll vnaußsprechlicher/Geistlicher/Freuden
von hertzen gesungen/*In manus tuas Domine commendo spiritum
meum*, HERR in deine Hand befehl Ich meinen Geist.
Also da der Erzvater Jacob/Gen: 47. vor Pharaone dem
König Aegypti bekennet vnd sagt / (Nach dem er fragte/
wie alt er were) Wenig vnd böß ist die zeit meines lebens/
Vnd langet nicht an die zeit meiner Väter in Irer wol-
fart. Ist im Geist gleich von hertzen frölich / Da er be-
denckt vnd weis / das er nu als ein wolbetagter/verlebter
alter Greiß/mit lang mehr zu leben hat / das sich sein seli-
ges Ende nahet/Frewet sich/das er kürzlich zu seinen lie-
ben Vätern vnd Vorfahren wandelt vnd versamlet wer-
den sol. Er sollte schier sagen wie S. Paulus. *Cupio dissolui.*
Ich beger auffgelöset zu sein.

Also gleubet vnd singet mit freuden auch ein Ikli-
cher anderer frommer Christ/Gott der Vater wohn vns
bey/vnd laß vns nicht versterben. Mach vns aller Sün-
den frey/vnd hilff vns selig sterben / 2c. Item: Wenn
mein Stündlein verhanden ist / vnd ich sol fahren mein
Strassen

Strassen/etc. Item *in articulo mortis*, gar am End / im Tod
des Sündlin / HErr Jesu (mit S. Stephano Act. 7.)
Nimm meinen Geist auff: Mit Simeone: Mit fried vnd
frewd ich fahr dahin/in Gottes wille. Dein bin ich/dein
bleib ich/Tod vnd lebendig/*Tibi vixi, tibi moriar*. Dir hab
ich gelebt/Dir wil ich sterben. Vnd dergleichen schönes
Trosts viel mehr.

Aber solcher Trost vnd Fridesart/ist den Glaub vnd
Gottlosen/Rohen Epicurischen/sichern verchtern Got-
tes vnd seines Heiligen Worts vnd Ordnung / den Ty-
rannē/ Ketzern/Schwermern/*Glossatoribus*, oder Schrifte
verkehrern/Die nur ihrem klugen kopff / in allem muth-
willen/vnd (wo es am subtilsten vnd besten gewesen) Ihrer
Sophistery/gegleubet vnd gefolget haben / sehr selzam.

Da heulet einer mit dem Brudermörder Cain/
O zetter/Meine Sünd ist grösser/Denn das sie mir im-
mermehr kan vergeben werden/ Der ander mit Saul/
Zuda/Daktor/Türcken/Franc: Spiera vñ unzählich vie-
len andern/Ach vnd weh / zetter vbern Teuffel vnd ober
Mich / vnd ober alle Meine Helffer vnd helffers helffer/
Die mir vrsach / Rath vnd that darzu gegeben vnd ge-
leistet haben/Ach wie vbel hab ich gethan / Das ich vmb
Geldes/Guttes/Menschen Gunst/vmb eines vergengli-
chen Ruhms vnd grossen Namens willen vnter vnd bey
den Leuten/Aus Ehrgeiz/Neid/Haß/2c. Den vnschul-
digen Gerechten Heilandt Christum/Die Euangelische
seligmachende Göttliche warheit / verraten / verkauft/

E

30

In vnschuldigen armen Leuten / Predigern vnd andern /
geleiert / verfolget / Vnd sonsten in allerley vntugenden /
Lastern / Sünden vnd schanden / ohne Gottes vnd Men-
schen schew / wie ein andrer | gewlicher Sodomit / Ja wie
ein vnuernünfftig Vieh oder toller Hundt / sicherlich da-
hin gelebet / getobet / gewüret / Geisilich taub vnd blind ge-
wesen / weder gesehen / gehört / gegleubt / gehorsamet noch
gefolget habe / Deme / was mir gut vnd seliglich gewesen
were.

Was hab ich nu für mir / Nichts / Als die bereite / ge-
wisse Helle vnd Ewig verdammnis / Wie *Leonides Egesip: lib: 5.*
Cap: 27. Sich vnd seine Gefellen tröstet: *Prandeamus hic*
in terris, Apud inferos canaturi. Nie zu Mittag gessen auff
Erden / Die Abendmalzeit in der Helle gehalten / 2e.
Gott behüt für solchem Trost / Dem kan man aber al-
lem zu rechter zeit / durch Gnad des H. Geists zuuor kom-
men / Wenn man sich von hertzen bekeret / Gleubet / Buß
thut / From wird vnd bleibt / 2e. Nie leset das 5. Cap:
im Buch der Weisheit.

Vom dritten vnd letzten Stück.

Berichttet vnd saget Sanct Paulus / Das die gleubti-
gen / außereelten lieben Christen / solchen Schatz
vnd belonung / nicht haben aus verdinst eigener guter
werck vnd würdigkeit / sondern aus brunlauterer Gnad
vnd

vnd Barmhertzigkeit des Himlischen Vaters / Durch
das teure verdinst/ Allein vollkommenen Gehorsam / Ge-
müthung/ Buß vnd zalung/ Intercession vnd vorbitt
des Herren Ihesu Christi : Wenn sie dem H Erren le-
ben vnd sterben.

Solchs zeigt der Apostel im Ende/ tröstlich vnd kler-
lich an/ do erspricht: Darumb ist Christus auch ge-
storben vnd Auferstanden vnd wieder lebendig worden/
Das er ober Tode vnd Lebendige H Erre sey / Das er/
Wie Anna Samuelis Mutter sagt / Beide tödten vnd
wieder lebendig machen könne/ Damit der Trost Ja wol-
gegründet sey vnd unbeweglich fest bestiehe / dauon Chri-
stus / Ioan 5. 8. vnd 11. Cap sagt/ Das / Wer da lebt vnd
glaubt an ihn/ nimmermehr sterbe.

So wir nun das/ herzliche Christen/ alle/ mit warem
lebendigem Glauben vnd zuvorsicht / wol fasten / merck-
ten/ vnd behilten/ Vnd vns vnser lebenlang/ Bis an vnser
Ende/ In lehre/ Wandel vnd leben/ in Gottes furcht / ge-
gen Gott vnd Menschen / gehorsamlich darnach richte-
ten vnd hiltten/ Weren wir fürwar nicht vmb sonst hie ge-
wesen/ Es dürffte vns auch des Stündlins/ oder was wir
damit oder darüber für zeit zubracht haben/ gar nicht ges-
rewen/ Denn wir hetten eine rechte/ gute/ Ja die nötigste/
beste / güldene Kunst / gelernet / Vnd wie wir demnach
dem H Erren leben werden / So werden wir auch dem
Herren/ an vnserm Ende in seine Schoß / Welche sonst
Lu. 16. Abrahams Schoß genennet wird/ seliglich sterbē.

Nun folget die Applicatio.

Weil dann dieser lobwürdiger Mann vnd Christlicher Held/der Bestrenge/Edle vnd Ehrenhese/
In Christo selige Herr Gaspar von Nostitz/2c. Durch
Gnad des Heiligen Geists / Dem Herrn Christo beides
gelebet hat vnd gestorben ist/ Den er Gottlob / Ankunfft/
Wandels/wesens/lebens/vnd Abschieds halben/ So ein
Mann gewesen/ Da ich mich viel zu wenig vnd gering
erkenne/ Nur etwas wenig vnd kurzes/ Vmbs Exempels
willen/ In Christlicher versammlung/ von seinem billichen
Lob vnd erweisen Tugenden / *infantiliter balbutiando*, zure-
den/ Ein grosser wolberühmbter vnd erfarnen Drator
vnd zirlicher Redner/hette alhie gnug zuthun/ Vnd wens
gleich ein *Cicero* oder *Demosthenes* selber were. Wir wol-
len einander allein in kurz vnd einfalt/ Des erinnern vnd
zu gemüte führen / Was wir von seinem Christlichen
Glauben/ Wandel / wesen vnd leben bis an sein seliges
Ende/ Vnd dann von seinem Christlichen gar tröslichen
Abschiede wissen / Vnd mehrer theils nicht von blossen
Hören sagen / Sondern an ihm selber gesehen/gehöret/
erkennet/ vnd erfahren haben vnd wissen.

Vnd damit wir vnser Red vnd Erinnerung / am
rechten gebürlichen Ort anheben / Ist Er von Christli-
chen/Gottfürchtigen Eltern/Aus einem löblichen/Alten
Adelichen Stam vnd Geschlechte / Deren von Nostitz/
Welches Je vnd alle wege/Bis nach auff diesen Tag vnd
Stunde/

Stunde / Gott helffe ferner mit Gnaden Amen. Viel fe-
ner / Redlicher / tapfferer Leute / zum Schimpff vnd ernst
(Wie man im sprichwort sagt) zum gemeinen Nutz in
allerley Regimenten / Wie im fall der Not (Ich sage one
heuchelen die warheit) mit vielen Exempeln vñ Historien
darzuthun / vnd zubeweisen were / gegeben vnd hat / Ge-
zeuget / geboren / bekommen vnterwiesen vnd auffgezogen /
Das beweiset man / vnter andern / gründtlich vnd Au-
genscheinlich / mit Ihrer (seiner Gottfürchtigen seligen
Eltern) löblichen Christlichen Kinderzucht / Sonderlich
an ihren / nuhmahls in Christo / seliglich ruhenden dreien
Söhnen / Herren Frankzen zum Leichnam / Herrn Ge-
orgen zur Gottaw / vnd diesem Herren Gasparn zum Za-
men / Gebrüdern von Rositz (Wir reden nur von denen /
so wir wissen) Wie die so treffliche tapffere Leute / wir
nennen solche Leute billich Christliche Helden / Die da
Patres Patria dem gemeinem Nutz / dienstlich / Jederman mit
Rath vnd That förderlich vnd beholffen / Vnd also Väter
/ freilich eine Cron / Ehr vnd zierde dieses löblichen
Marggraffthums / Ihres lieben Vaterlandes gewesen
sein / Vnd ist an ihnen war / was man saget / *Viuu post funera
virtus* Deren sich nicht allein nach ihrem Tode / ihre Ge-
mahl vnd Kinder / Sondern das ganze Adelige löbliche
Geschlecht vnd Freundschaft / mit vnuergenglichem Lob
vnd Ruhm zu trösten vnd zu frewen hat.

Wie ihnen / sonderlich dieser gegenwertigen Person /
Herrn Gasparn von Rositz / seligen / zeugnis / vnd meiner

E iij

Rede

Rede Beifal gibt / Das sehnliche seuffzen vnd klagen /
So von Erbaren Leuten / nicht geringes Standes Per-
sonen / Ob vnd baldt nach seinem Tödelichen abgange /
Ich albereit in der Stadt Bauzen gehört habe / Ach
welch einen thewren / nützlichen / nöttigen Man / hat dis
Landt verloren. Das Register (also nannte ihn mit seuff-
zen / eine Furneme Person) dieses Marggraffthums /
Ach / Do es Gottes wille gewesen were / Das er doch
nach etliche Jahr het leben sollen / Besorge / Wir werden
ihn erst nu recht miessen / Vnd dergleichen wort vnd reden
mehr / Er war ein Auge dieses Lands vnd Marggraff-
thums / 2c.

Weil er dann / Sampt seinen geliebten In Christo
seligen Herrn Gebrüdern / Herrn Franzen / vnd Herren
Georgen von Nositz / So eines Löblichen / gutten Alten
Geschlechts / von Christlichen / Adelichen / Ehren vnd
Tugentreichen Gottfürchtigen Eltern geboren vnd
aufferzogen / So wol geraten / vnd solliche nützliche / wol-
berümpfte tapffere Menner worden vnd gewesen seindt /
folget / Gnugsam vnd wolbeweist / Das Er wolge-
dachte Herren Brüder so wol / auch in Ihrer Jugendt /
Wol ermelten Ihren Eltern / Christliche Gottfürchtige /
Gehorsame / Befolgtige Fromme Söhne gewesen sein.
Dann diese beide sollen vnd müssen nothalben bey einan-
der sein / Christliche Eltern / Gehorsame Kinder / Vnd
beider-

beiderseits emsig Gebet vmb Gottes Gnade vnd Segen.

Das solten vnd möchten warlich Junge Leute /
Redlicher vnd löblicher Eltern / Verumbter Adels Per-
sonen / Kinder / wol mercken vnd behalten / Sich darinnen
zu rechter zeit spiegeln vnd beschawen In ihrer Jugendt
auch also anlassen / Das man an ihnen gute Hoffnung
haben köndte / Sie würden ihrer wolberümbten lieben
Eltern / Ahnen vnd Vorfahren / durch Ehre / Redigkeit
vnd tugend / wol erlangte Wappen / Schildt vnd Helm /
Nicht allein gleicher gestalt in Gottes furcht / Durch Ehr
vnd Tugendt / erhalten / Sondern zieren / ehren vnd ver-
mehrten / Das man nicht sagen möchte *Vrit mature quod vide
urtica manere* Dann vermittels Göttlicher Gnad vnd Seg-
gens / vnd durch erzelte Mittel / wird / der für vnd an sich
selbst Hochlöbliche Adel / von einem auff den andern / ver-
erbet / vermehrt vnd in seinem rechten Werth / Stand vnd
Wesen erhalten / Sonsten vnd ohne das / Werden die Kin-
der vnd nachkömmling / Allein Edel / mit vnd nach dem
Namen / Von Ihrer Wolberümbten Aherrn
Großväter / Eltern vnd Vorfahren / Löblichen Adels
lichen Thaten / Aber nicht von Ihren eignen / Ach
Herz liebe Christen / Junge vnd Alte / Wort vnd
Thaten / sehen im Alten Wapen / Schild vnd Helm /
gar Löblich vnd wol bey vnd neben einander /
Darnach

Darnach Junge Leute (wie Gottlob ihrer sehr viel thun/
Gott stärke vermehre vnd erhalte sie Amen) Billich
trachten vnd streben sollen/ Daran sie Gott ein wolgefalle-
nen thun/ Vnd dardurch die lieben Engel im Himmel/ Ihre
Christliche Eltern/ Ihr löbliches Altes geschlecht vnd alle
Erbare Freundschaft/ Ja die ganze Christenheit er-
freuen/ Daher nennet *Arist: 4. politic: den Adel Antiquas Diui-
tias* einen alten schatz vnd Güter/ *Nil prodest generatio clara, ei, quem
sordidant mores* sagt *D. Chrysostomus.*

Ja die erzelten Tugenden / an dieser vielgedachter
Christlicher / Gottfürchtiger vnd In Christo Seliger
Person/ Herrn Casparn von Rositz / zeigen vnd bezeugen
vns / noch viel ein herrlichere / Höhere Tugendt/ Aus
welcher / als aus dem rechten Brunnenquel / durch gnad
vnd wirckung des H. Geistes / Die andern alle fließen/
Nemlich / Einen rechten Glauben / vnd ware furcht Got-
tes / Welche aller weißheit anfang ist.

Das hat Er beweiset / nicht allein an vnd mit seiner
Person selber / Das er Gottes Wort geliebet / gerne ge-
höret / die Hochwürdigen Sacrament / nach Christi Ord-
nung vnd Befehl Hoch vnd her gehalten / Das Heilige
Abendmal des Herren Christi / auff fürgehende Beicht
vnd Absolution / etliche wenig sündē / für seine in seligen
Ende / in rechtem Glauben vnd Bekendnis / mit Herkli-
cher grosser Andacht vnd gebürlicher demütiger Danck-
sagung / Empfehlung vnd gebrauch / Sondern dis alles /
Durch trewe rechtschaffene Leerer / Bey seinen Vnder-
thanen

thanen vnd Mündlin / In ihren Kirchen treulich gefor-
dert vnd erhalten / bis ans Ende / Gott helff ferner mit
Gnaden Amen. Dabey auch den Dienern gebürliche
ehre / vnd mögliche förderung erzeiget.

Da dargegen ist an vielen orten / manche / Balde /
In der Jugendt / von Gott vnd Christo / Seinem Heili-
gen wort vnd Euangelio / einfeltigen / rechten vnd schlech-
ten verstand vnd brauch / Nach Christi Allmechtigen selbst
eignen Wortten / Befehl vnd Ordnunge / Von den Hei-
ligen Sacramenten / Sonderlich vom Hochwirdigen
Abendmal / Wollen der Armen einfeltigen / euerigen /
beständigen verachten Diener / Lehrer vnd Prediger / ger-
ne geschwigen / Wenn sie nur das Maul auffthun / Nie
scherzlich vnd schimpfflich gnug reden können / Dfft an-
dern Leuten vnd guten Gesellen / mehr zugefallen / Denn
das sie es im hertzen / ernstlich also meinen möchten / Dar-
für sich Ja alle Christliche vnd Gottfürchtige vom Löbli-
chen Adel / heut vnd allezeit ihr lebenlang / auffß fleissigste
hütten sollen vnd wollen / Denn / Weh / sagt Christus
Matt. 18. dem Menschen / durch welchen er gernüs kömpt.
Matt. 12. Es kömpt die zeit / das die Menschen / müssen
rechenschaft geben / Am Jüngsten Gericht / von einem
Tetzlichen vnnützen Wort / das sie geredt haben. Da wird
alle Lesirer vnd Spötter / wie hoch / gelehrt vnd flug sie
sich gleich Ist / wieder Christum / in Geistlichen vnd Göt-
lichen sachen / düncken lassen / vielleicht auch wol sein / Der
scherz vnd schimpff gerewen / Vnd auff einen solchen ge-
ferlichen /

S

ferlichen /

ferlichen/ergerlichen Schertz/ein Ewiger vnaussprechlicher grosser Ernst erfolgen / Gott behüt vns alle für der erfahrung Amen. Ich weis das Ich/in meiner Einfalt/ mit meinem Herren Christo war reden/ vnd nicht verlieren werde/ Den ich führe vnd brauche/nicht meine/Sondern Seine eigne/Allmechtige/Krefftige/Gewisse/Klare vnd ware Wort/Da von Er selber sagt/Luc. 21. Himmel vnd Erden vergehen/ Aber mein Wort vergehen nicht.

Ferner ist wolgedachter / In Christo seliger Herr Gaspar von Nostitz / Mit allein diesem Lande vnd Städten/als seinem Vaterlande/ Ja wol auch frembden / vnd Ausländern/ein Nützlicher/eröslicher/dienstlicher Man gewesen / Wie ers in löblicher vielfeltiger versammlung/ der Herren/Vom Land vnd Städten/offte gnugsam beweiset/ Das Maul / Wie man spricht / redlich vnd vnerschrocken auffgethan / vnd kein Blat dafür genommen / Sondern vmb des Landes vnd Städte gemeinen Schaden/Vnd wiederumb zu derselben Gemeinen Nutz vnd frommen/gedeien vnd wol fart/vnerschrocken/Doch, als ein Weiser vnd verstendiger Man / Mit vernunft vnd grosser bescheidenheit/ geredet/Vnd seind seine wort / gemeinlich Genter wort gewesen / Sondern Er ist neben vnd bey diesem allen / Seinen Vnderthanen / ein wol leidlicher Herr/Auch den Benagbarten friedsam/freütlich vnd so viel möglich/Jederman/mit geneigten willen/dienstlich vnd förderlich gewesen / Des mus vnd wil ich
mit

mit warheit vnſre Stadt Bauzen zum Exempel ſetzen/
Daraus ein Jeder ſpernen kan / Das er ein rechter
guter Nachbar vnd trewer freunde vnd liebhaber der
Stadt vnd Bürgerſchaft geweſen. / Denn als wolge-
dachte Stadt / mit ihren Bürgern vnd Einwohnern / zim-
licher groſſer anzal / Für zwey vnd drey Jaren / Wie vns
Gott / vmb vnſerer Sünden willen / mit der Vater Rute /
doch Gnediger / Denn Ichs vnd viel meines gleichen ver-
dint hatte / ſehrlich gnug daheim ſuchte / durch Peſt vnd
Sterbens gefahr / Da wir ſonſin ihrer vielen / Strücker
vnd wol gar *Anathemata* waren / Gottvergeb es Inen / vnd
vns von vielen andern orten / ſehr wenig zugienge / thet er
das freundebeſte / Fordert / Ja erhielt wie ſonſt etliche be-
nagbarte / Sonderlich von Städten / mehr / vnſer Stadt /
mit allerley zugang an Fiſchen / Butter / Keß vnd andren
Vitalien / vmb einen zimliche werth vñ Pfennig. Welche
Nachbarliche trew vnd förderung Gott / Ihme / Seiner
Chriſtlichen Ehrentugentſamen Wittſrawen / Vnd der-
ſelben Erben vnd Kindern / hie vnd dort / Ins dritte vnd
vierde Glied / mit Gnaden zalen vnd vergelten wolt / So
wirts auch die Stadt Budiffin / iho vnd fünfftig / vnbe-
dacht vnd unbedanckt nicht laſſen.

Weil Er dann ſo Gleubig vnd Gottfürchtig / Chriſt-
lich vnd Friedſam / züchtig vnd Engezogen / Eines Gottes
ſeligen Erbaren Wandels vnd Lebens / von Jugend auff /
Bis in ſein zimlich hohes Alter / ja bis an ſein ſeliges ende
geweſen /

gewesen/ Hats im der Getreue Gott/durch seine Barm-
herzigkeit/Nach seiner zusage/wol vergolten vnd genieß-
sen lassen/Ime mit seinem Ehrentugentfamen Gemahel
vnd Chrslichen Hausfrawen / In Ihrer züchtigen/
friedsamen Ehe / Darinn sie einander / In beständiger
Ehelicher lieb vnd Treu / Bis Ins drey vnd dreissigste
Jar/ beygewonet/ Sie an Seel/Leib/Gut vnd Narung/
reichlich vñ miltiglich gesegnet/Am leibe/langwiriges
leben vnd gesundheit/Ehr vnd Gemach/Abzehen leben-
dige Kinderlein bescheret/sechs Söne/die Gottlob noch
zur zeit (Gott helff ferner mit Gnaden Amen) alle im le-
ben/Als die Junckern/Gaspar/Asman/George/Nickel/
Christioff vnd Frank Gebrüdere von Nositz/Welche wie-
rentzils auch studiren/vnd sich im selben / vnd sonst Gott-
lob allenthalben Chrslich vnd wol anlassen/Gott geb-
ihnen seine Gnade / Amen. Von den Töchtern seind
Gottlob auch noch sechs im leben/Die andern seind selig-
lich entschlaffen vnd ruhen im Herren / Der lebendigen
vnd meisten teils verehlichten Namen seind diese / Die
Ehrentugentfamen Frawen/Fraw Sybilla/des Ehren-
vhesien vnd Edlen Junckern Abrahams von Herßdorff
Gemahl zu Nückenhain/Fraw Martha/des Edlen vnd
Ehrenvhesien Junckern Georgen Feneritz zur Dels/
Seligen nachgelassne Wittfraw / Fraw Anna / des Ed-
len vnd Ehrenvhesien Junckern Adams von Kottwitz zu
Nichaw/Gemahl / Fraw Dorothea / des Ehrenvhesien
vnd

vnd Edlen Junckern / Heinrichen von Timmeritz zum
Särichen / Gemahl. Vnd beide Jungfrauen / Jungfrau
Elena / vnd Jungfrau Catharina / Denen G D E Z
sampt den Ihren / Seine Gnade / Langwirtige Gesund-
heit / vnd alle wolffart / Durch seine Barmherzigkeit /
Väterlich verleihe / Amen.

Ihre offte vnd wolgedachte Christliche Eltern / hat
auch der liebe Gott / am Gut vnd Narung nach ihrem
Adelichen Stande / zur nothdurfft gesegnet.

An der Seelen aber / Mit dem Himlischen /
Ewigen Schatz vnd Gut / Nemlich / Durch rechte Lehr /
verstand vnd Brauch der Reinen Euangelischen warheit
vnd Hochwirdigē Sacrament / vermittels der Gnad vnd
wirckung des Heiligen Geistes / Mit dem waren Erkennt-
nis G Dtes vnd seines Gnedigen willens / Mit einem
Gleubigen / gehorsamen / demüthigen hertzen / zu Er-
leuchtet / gestercket / getröstet vnd erhalten / Bis an sein
Ende / vnd Ihn vor demselben / den Tode durch Kranck-
heit vnd schmercken / nicht lang Peinigen noch quelen
lassen / Sondern mit Ime / wie die Heiligen Propheten
Reden / zum Seligen Ende geeilet / Vnd in für grossen /
gewis Künfftigen vnglück ober unsere Welt / Vmb irer
greulichen Epicureren / Sodomiteren / Sicherheit / vn-
danckbarkeit / etc. willen / Seuberlich weggenommen / Ja //
Wie Esaias redet / gerasset / Da Er sich dann zuvor /
mit einem guten Viatico vnd Vorrat auff diesen Weg
vnd

vnd Kaise / denen wir alle Stunden vnd Augenblick /
auch vor vns haben vnd gewertig sein / Auch bey gesun-
dem leibe / Nemlich / Mit Gottes Wort / Absolution
vnd Hochwirdigen Sacraments brauch versehen vnd
versorget / gefast vnd geschickt gemacht.

Vnd Ob wir wol / Die gnadenwerck Gottes vnd
Gaben / des Heiligen Geists (Aber weit nicht / Wie sie
Gottlob an ihm gemerckt / gespüret vnd gewesen / Denn
darzu erkenn ich mich / ohne heuchelei / Wie oben gemelt /
viel zu wenig vnd schwach) Nemlich den Glauben vnd
Gottseliges leben / an Ihme *propter Exemplum*, Billich rüh-
men / So solt doch beide vns vnd Ihme / nicht also ver-
kerlich gedeutet verstanden / oder nachgeredet werden /
Als wolten wir ihn derwegen gar für Engelrein / Nicht
für Adams vnd Euae Kinde / als einen / auch gebrechtl-
chen Menschen vnd Armen Sünder / Sondern für ei-
nen lebendigen ganz vollkommenen Heiligen (Welchs wie
Salomo Prouer: 20. saget / kein Mensch auff Erden
ist noch sein kan) gehalten / Gerühmet vñ für gestellt ha-
ben / O Nein / Das ist er nicht gewesen / Begert vnd darff
auch solches rühmens nicht / Denn wofür Er Sich sel-
ber / für vnd gegen dem allein / Gerechten Gott / allezeit
seines lebens vnd bis an sein Ende / ganz demütig er-
kandt vnd gehalten / Bezeuget vnd weist ganz gewal-
tig aus / Das demütige / herzhliche begeren vnd seuffzen /
Nach Göttlicher Grad vnd Barmherzigkeit / nach der
tröstlichen

tröstlichen gnadenreichen Absolution / vnd Hochwirdi-
gen Sacrament / 2c. Dadurch ihn Gott / mit seinem
Heiligen Geist / im Glauben an Christum gestercket / ge-
tröstet / Ihm alle seine Sünde vergeben / Alle seine Ge-
brechen mit Christi vnschuld / Tod vnd Blut abgewasch-
en / gerechtfertiget / gereiniget vnd erhalten hat (Welchen
Trost / auff Gottes zusage durch Christum auch wir vnd
alle Sterbige haben) mitten in Tode / zum freudenrei-
chen Ewigen leben.

Hat auch ganz Andechtig / vernünfftig vnd beschei-
den geredt / Bis Er in grosser gedult / mit herzlichlicher An-
ruffung / Beständigem Erkendnis vnd Bekentnis / des
einigen waren Heilandes Ihesu Christ / Mit vnd vber
dem Gebet / Sanfft / Seuberlich vnd gewis in Christo
seliglich / entschlaffen / vnd von diesem Jammerthal ab-
gescheiden ist / Als Er das selbe viretel Stündlin zuvor
von seinem lieben vnd Eltern Sohn / Dem Edlen vnd
Ehrenvhesten Junckern Gasparn von Rositz / zum Ba-
lete vnd gutter letzte / für andern Getrencke / einen Trunck
vom Alantwein / begehret vnd Empfangen. Vnd drauff
am selben Sonnabendt / do er sich zuvor vom Freitag
her / Denselben ganzen Tag / etwas matt vnd
schwach gefüelet vnd geklagt / zu Nachts vmb Euff
vhr / verschieden / Do er seines Alters volkome-
ner / 62. Jahr gewesen / vnd eingegangen ist Ins 63.
Welchs solchen Leuten / *Heroicis* Personis / Wie auff
den fall der Noth / auch bey vnsern lebezeiten / mit
vielen

vielen Exempeln darzuthun vnd zubeweisen / gemeinlich /
Doch nicht one Gottes willen vnd vorsehung / Wie
Annus climactericus, also Vita periodus fatalis ist. **G D E** ist
aber mit seinen außerselten / *ans fatum* / an diese vnd an
dre ding / mit nichten gebunden. Er weis vnd trifft mit
Ihnen zurechter zeit / ein fröliches vnd Seligs Geburt
Stündlein / Drum weis vnd trifft er auch wol hernach /
Wie mit dem Alten Simeone / zu rechter zeit / ein fried-
sames / Fröliches vnd Seliges Sterbstündlin. Vnd
mache mir gar keinen zweuel / E. L. Als Euangelische /
Gottfürchtige / Christliche verstendige Leute / wissen vnd
versiehen mehrentils / Gottlob / gar wol / Was wir mit
dem *Fato in Theologia* meinen / 2c.

Wolt nu **G D E** von Ewigkeit / Das dieses Christ-
lichen Mannes / fast vnuersehner / Tödlicher Abgang /
nicht etwa seinen Waisen / (darunter auch bedacht vnd
verstanden werden sollen / seine Mündlein) die eines sol-
chen Frommen Vaters / treuen Vormünder / vnd gar
Christlichen Lehr vnd zucht meisters / nach wol lenger be-
durfft hätten / nicht zu frü vnd schnell / ergangen vnd ge-
schehen sey / Dann man weis aus der erfahrung / Wie
es mit ehlichen / auch in diesem löblichen Stand des Adels
offt zugegangen hat vnd zuzugehen pfleget / Wenn Inen
Ihre Gottfürchtige / Christliche Eltern / Gleicher gestalt
Treue Vormünder / vnd Plegväter / jurisch durch den
zeitlichen Tod weggenommen werden vnd abgehen Dann
diese Welt vnd Leut / wollen gemeinlich / Aber zu Ihrem
grossen

Grossen schaden vnd verderben / vngesangen (sonderlich
von andern / wie sie reden) vnreformiret / vngeloffiniret
sirt / vnangerede vnd vngestrafet sein. Geraten darnach
in Religions vnd Glaubens sachen / zu den Kotten vnd See-
ten / (Weil es alles der vernunft begreiffflich ist / gleisset /
vnd derwegen wolgefelle) in verdamlische falsche Lehre /
vnd subtile Schwermerey / Darnach in greulich Gottes-
lesierung / Im wandel vnd leben zu Epicurischen guten
Gesellen / zc. Vnd wer kans / Wie es in der Welt / vnter
allen Stenden zugehet / zuweilen nach wol bey der Christi-
lichen Eiueringen Eiter vnd Vormänden leben / alles be-
dencken vnd erzehlen / Da gehts denn freylich wol / Wie
D. Augustinus sagt: *Repressa disciplina, seuit impunita nequitia*
Da ist dann die liebe zart Jugend in der besten Blüt / mehr
denn halb vertorben. Dann die guten Leute seind weg
die da strafften / Vnd fur denen Sie bey Ihrem leben /
nach billich / eine schew vnd entschuzung hatten vnd haben
musien / Welchs Sie für andern Leuten nicht haben / Ob
Sie wol Erbar / Christlich / Gottsfürchtig / From / vnd
bißweilen Ihre nahverwanten seind / vnd es freilich mit
Ihnen auch von herzen treulich vnd gut meinen / Die
werden offft von ehlichen mehr veracht (wo nicht zu wei-
len viel vngedürlicher tractire) Denn mit gebürlicher re-
uerenz vnd vnd danckbarkeit / gehört / verchrt vñ angeno-
men. Welcher Besorg man aber / Gottlob an denen
Orten / so hoch nicht bedarff / Wo nicht allein die Eltern /
Vormänden / zc rechte Eiueringe Christen gewesen sein /

S

Sonder

Sondern auch in der Jugend / bey Kindern vnd Münd-
lin / *Bona Indoles*, vnd derwegen gute Hoffnung ist / Weil
Sie sich beim leben der Eltern vnd Vormündern / *Obedien-
tia pietatis & disciplina*, Mit gehorsam der Erbarkeit vnd
zucht / 2c. Demüthig vnd wol angelassen / Das sie entwe-
der / Christlicher / Erbarer / Fromer Leute trewen Rath /
nötige Vorstraff vnd gute vermanung / nach forthin
auch mit danck annehmen / Sich darnach halten / Oder
ja selber (Wie ich mich dieses Christlichen Orts / auch
keines andern versehe) durch Gnad des Heiligen Geistes
Christlich zuregiren / vnd aller gebür vnd billigkeit zuuer-
halten werden wissen / Da wird dann der H. Erre / mit
Gnade / leben vnd Segen / Psal. 133. allezeit bey Ihnen
sein vnd bleiben / Amen.

Darnach wünsch vnd sag ich ferner von herzen /
Wolt Gott von Ewigkeit / das dieser Furnemen Person /
fast vnuersehner Tödlicher Abgang / nicht diesem ganzen
Land vnd Löblichen Margaraffhumb / Weil Er vnter
vnd andern / noch lebenden / Die Gott in guter langwiri-
ger gesundheit erhalten wolle Amen / *Pater & Oculi patrie*
gewesen / auch zu schnell gescheen vnd nachthölig sein
möchte / Denn wir hören vnd erfahren nicht alleine / fast
vberal vnd von allen Orten her / Wie treffliche furneh-
me / hohe Leute / Von Fürslichen / Adeltichen / beide Geisti-
lichen vnd Weltlichen Standen / Auch in den Fürnembsien
Städten / Bey vns vnd anderstwo / Bürgerlichen Per-
sonen / offit / sich gar vnuersehens dahin gehen vnd sich
von vns / aus dieser bösen Welt / sehnen vnd eilen. Sons

Denn neben den vorelmelten dreyen löblichen Adels
Personen/Herrn Gebrüdern von Rositz/seligen/Haben
wir aus diesem Marggraffthumb/newlicher zeit für ons
anhin geschickt / die trefflichen zween Menner / vnd Alte
Adels Personen / Den Geseirengen / Edlen vnd Ehren-
vhesten Herrn Hieronymum von Rositz/zwey vnd zwen-
zig Jar Hauptman zu Görlitz/2c. Welcher ein geleerter/
Gottfürchtiger/wolgebeter vnd erfarnier Man / wie sei-
ne hernachfolgende eigne Epithauia vnd Grabchriften
zeugen vnd außweisen/ Anno 1523. Geboren / vnd nun Anno
1584. den 1. Decemb. zu Naundorff im Herren seliglich ent-
schlafen/vnd zu Kottenburg am Queis begraben/Daraus zuuer-
nehmen/ Das er ein Man auch eines hohen Alters gewesen ist.

Vnd dann/den auch Geseirengen/Edlen vnd Ehren-
vhesten Herrn/Christoffen von Mezerad zur nider Key-
ne/Welcher viel Jarlang / Amptman auffm Egen / vnd
des Jungfrauen Closters Marten Stern / Bont/ gewe-
sen/Vnd Anno 1586. den 25. Septembris / Sonntag vor
Michaelis / frue gegen Tag zwischen 4. vnd 5. vhr / im
Herren seliglich entschlaffen / vnd Donnerstag hernach
alhr/in der Thumb vnd Stadt Pfarrkirchen zu Budis-
sin/in einer grossen Frequenz / allerley Standes Erba-
rer Leut vnd Personen/Christlich vnd Ehrlich begraben/
Ein Man voller Glaubens/trew, aufrichtigkeit/Erbar-
keit / gutes raches / freundtligkeit vnd aller Christlicher
Adelicher Tugenden / Vnd sonst viel andere mehr fur-
nehme Leute auffm Lande vnd in Städten / bey ons vnd
anderzwo.

Was

Was nun solchs bedeute / ist gnug vnd wol abzuneh-
men / Wei! Esa: am 56. so außdrücklich sagt / Sie werden
weggerafft für ein vnglück / kommen zu fried vnd ruhen in
Ihren kamern / 2c. Mus warlich nicht viel guttes / Der
Welt / für der Thür / Wo nicht gar im Hause vnd auffm
halse sein / Aber wir befehlen von herzen heut vnd allezeit
Gott dem Vater aller Gnad vnd Barmherzigkeit /
durch Ihesum Christum seinen lieben Sohn / Diese
Land vnd Städte / Vns vnd alle ihre Einwohner / Er wol-
te Sich vnser in diesem Elenden betrübtten Jammerthal
Väterlich erbarmen / Die langst vnd woluerdinten stra-
ffen / gnediglich abwenden / Rechte Lehr / vnd Gottes-
dienste in vnserer / vnd alle andern Kirchen vñ Schulen för-
dern vnd erhalten / Auch trewe weise / versündige / Gott-
fürchtige / Demütige Leute / zu allen Regimenten für
vnd für / geben vnd bescheren / Die itzigen in gutter ge-
sundheit bewaren / Allen Sündern ware besündige
Busß / Bekerung vnd besserung / Glauben vnd gut Ge-
wissen bis ans Ende trewlich zuerhalten / Gnade verley-
hen / vns allen / ein seliges Ende vnd fröliche Auferstei-
hung / Sampt dem fromen vnd seligen In Christo / Her-
ren Gasparn von Noßitz / vnd allen Außermelten /
mit verflertem Leibe / zum freudenreichen Ewi-
gen leben / bescheren. Amen / ach Herr
Ihesu / Amen.

E N D . E.

NOBILIS AC STRENVVS
VIR CASPARA NOSTITZ CARNIS
SV AEDEBLTVM SOLVIT, ANNO A CHRISTO NATO
M. D. LXXXVII. 16. Kal. Feb.

Annus obitus in singulis distychis compræ-
hensus est.



SPLENDEAT ANTONII TERRA HIC LVX SACRA, VOLENTE HO
CASPAR VTA NOSTITZ TRANSIT IN ASTRA, DEO.
AETATE IS FELIX. ISTOS PERVENIT AD ANNOS
QVOS HOMINES RARÒ PRÆTERISSE QVEVNT.
HVIC VTERAT CERTANS MORITVRO IN CORPORE VITA,
PRO PATRIA QVÆ NON FECIT & ILLE VOLENS
OSTENDENS, SANCTA ECCE SVOS PIETATE PRÆIBAT.
NOBILIBVS CVNCTIS QVÆ SIT EVNDA VIA.
PRÆSTANS ORNATO & SVCCINCTIS MORIBVS ORO:
EXTVLIT HIS CLARA & NOBILITATE GENVS.
HÆREDES MAGNÆ PATRIÆ VIRTVTIS, HONORIS.
AVT VOS EX IPSA NOBILITATE PARES,
VESTRI DILECTI CORPVS DEFLETE PARENTIS,
LVGVRES CANTVS NECTITE QUÆSO PII.
QVE SVÆ ERANT REPERIT CÆLORVM RECTOR & AVTOR:
IVSTITIÆ & STRICTÆ SAT FACIT ILLE SVÆ.
OMNIS HIC ORNATVS TELLVRE PVRESCEAT IN IPSA,
CORPORIS IN CINERES PER SOLVETVR ONVS.
AST ANIMA ILLIVS, VITÆ QVE LABORE RECESSO
REVERA CÆLI RVRA QVIETA COLIT.
QVIS NON FRIGVS CRIT, QVIS NON TORQVEBIT EGESTAS,
VIVET. AB ÆTERNA LIBERA MORTE, DEO.
NUNC GAVDERO POLO VIR PRÆSTANS, NOBILIS ALIO,
ILLE TVA DIGNVS NOBILITATE LOCVS.
CORPORIS INTEREA PLACIDA VTERE QVÆSO QVIETE,
NUNC SONVS AD CHRISTI TE CRET ORA TVBÆ.

Dieser

Dieser hat gezeuget Söhne vnd Töchter wie oben
In der Predigt gemeldet.

*Nobilis & strenuus vir Franciscus à Nostitz placide in Christo
obdormiuit anno Christi 1587. 3. Kal: Octob.*

Franciscvs, castis reColabant festa Ministris,
A Nostitz LVstrat raptvs Vr orbe polos
Mors CVIVs Certa est, inCerta at fVneris; hora,
Nos rege nos ipsa ac Chrlste saLVre bea.

Dieser hat gezeuget / Die Edlen Ehrenphessen/
Junker Ulrichen/vnd Jungfraw Helenam von Nostitz.

*Vir item nobilis ac strenuus Georgius à Nostitz pie decessit Anno
Christi 1579. 6. Kal. Ixbris,*

MortVVs à Nostitz (I C Ipe GeorgIVs, IahIC
Ternona OCtobris LV Ce nstente, laCer,
Dignvs honore sVo, teneræ qVI nobilitatI
Et iVngit Mores In pietate bonos.
RaptVs ab his terris est, Liber ViVer at Ipe,
Debita & In terris fama iVperstes erit.

Dieser hat gezeuget / In der Ersten Ehe / mit der Eh-
rentugentfamen Frawen Saren 3. Kinder / Hieronymum / die Ehren-
tugentfame Fraw Anna / des Edlen vnd Ehrenphessen Junkers
Georgen von Rabenaw zur Hammer Stadt Ehgemahl / vnd die Eh-
rentugentfame Fraw Helenam / des Edlen vnd Ehrenphessen
Junkern Nickels von Klücks / Ehgemahl zu Döbrschitz.

In der andern Eh / mit der Ehrentugentfamen Frawen Anne
Gebornen von Gerssdorff / ist / Des Edlen vnd Ehrenphessen Jun-
ckern Nickeln von Zeyschwitz Ehgemahl zu Pliskowitz / Zwene Sö-
ne / die Ehrenphessen Junkern Georgen vnd Christoffen die Ehren-
tugentfamen Jungfrawen Mariam vnd Sybillam / Geschwister von
Nostitz.

*Carmen D. Hieronymi à Nostitz pia memoria à seipso ante mor-
tem compositum.*

Cum

Cum morior miseram meliori tempore vitam
Et densas clara per muto luce tenebras
Quod linquo: manibus Domini committo paternis
Ipse fouebit, alet seruabit, nutriet omne.

*Epitaphium D. Hieronymi à Nostitz paucis ante mortem diebus
sibimet à seipso conscriptum 1584.*

Hic qui stirpis eram, mea sunt Hieronymus ossa
Nostitiae, Mens est Christe remissa tibi:
Morte tua mortem tollis, vitamq; reducis
Quae mihi post veniet te veniente noua.

*D. Hieronymus à Nostitz praefectus Gorlicensis obiit Anno. 80 in Neun-
dorff. Sepultus in Rotenburg.*

Nobilis hac terrae dormit Hieronymus Vrna,
Stemmata Nosticio nomina clara trahens.
Gorlicij praefectus erat, prudentia cuius
In rebus dubijs, Cognita saepe fuit.
Sinceræ fuit quoq; religionis honorem
Et verè tribuit quæ tribuenda Deo.
Exspectat Christum redeuntem in nubibus altis,
Aspectu exoprat cuius & ipse frui.

*Von dieses Herren Kindern / hab ich noch izt zur zeit Keiner gewis-
sen bericht / Seine hinterlassne Wittwe Ist die Ehrentugentfame
Fraw Anna / Geborne von Temmeritz.*

*Nobilis & strenuus vir Christophorus à Metzrad Cœnobij Mariæ stellæ Prae-
fectus vita defunctus est Anno Christi 1585. 7. Kal. Xbris.*

EX VIVIS transit, Cœli hoc Rectore Volente,
ReiplenDer terræ quæ Catharina Die,
Nobilis à Metzrad, virtute ornatus & arte,
Prestans egregio, iustus, honore plvs,
Christophoro Cui no Men erat quæ Cui Cra relinqvEs
is piger in Christi non erat ipse iugo
Gramineoq; ve latent sub cespite corporis ossa
EXCELSA at Verè spiritvs astra COLIT.
Rursvs & expvlso hic corpvs torpore resurgere
Contra spem spes hæc peCtora nostra regat.

*Herr Christoff von Metzradt ist ohne Kinder vnd Leibs Erben
verschieden.*

ZA 890 PK

715



Per Ed 890, au

ULB Halle

003 075 508

3








QK 307

v. Nostitz
Leich Predig.

Z d.
890

Über der Christliche

Leich vnd Körper / des Bestrengen / Edlen
vnd Ehrenhessen Herrn Casparn von Nostitz des Eltern
auff Zamen/ze. Welcher daselbst im Marggraffschumb Ober
Lausitz / Im Herren Christo / Sanfft vnd seliglich entschlaffen ist /
Am Sonnabende / des Tages S. Antonij / den 17. Januarij / zu
nachts vmb 11. vhr / Vnd inn beysein einer Christlichen / Erbaren
grossen Frequenz vnd versamlung / löblicher Adels vnd anderer Per-
sonen / am Freytag vor Sanct Pauli bekerung den 23. Janu-
arij / In seiner Pfarrkirchen zum Klitten / Begraben /
Im 1587. Jahr / nach Christi Geburt.



Durch

Den Alten Laurentium Dresserum Girca-
uientem, Euangelischen Prediger
zu Budissin.

Viuit post funera uirtus.

Gedruckt zu Budissin / durch
Michael Wolrab.

